





Сен ўзингга қилибсан шайдо  
Эй, юртимнинг ҳусни, жамоли.  
Ҳар онингга бўлсин жон фидо,  
Инштитутини мұқаддас, олий!!!

© «ЕШ ГУАРДИЯ» нашриёти, 1979.

# **ШУҲРАТ**

•

# **ШАЙДО КҮНГИЛ**



**Шеърлар**

**Ўзбекистон ЛКСМ  
Марказий Комитети  
«ЁШ ГВАРДИЯ» нашриёти  
Тошкент — 1979**

## ЭҲТИРОС МЕВАЛАРИ

Ҳар бир янги тўплам шоир умрининг бир қисми бўлади. Бамисоли терим машинаси бункерини бўшатгандай, шеърият хирмонига бир китоб шеър тўккан шоир ҳам ўзича бир силкиниб олади.

Мен Шуҳрат аканинг кўп китобларини ўқиганман, унинг тиниқ ва равон шеъриятига ҳавас қилганман, сатрларнинг табиий ва енгил оқимидан завқланганман. Ўша «Кавказ дафтари» ҳам, «Мангулик» ҳам ўзининг соддалиги, ўйноқилиги, кўтаринки руҳи билан кўнглимда ёрқин из қолдирган.

Мана бугун мен шоирнинг янги, куни кеча тартиб берилган китобини ўқиб турибман. Шуҳрат ака яна ўзига содиқ.

Бу шеърларнинг муаллифи олтмиш ёш довони устидаги турганига ишониш қийин,— мисралар ёшлик ҳарорати, ғурури, эҳтироси билан шу қадар тўлиғ!

Дунёning кўп аччиқ-чучугини кўрган, шеърият билан, суронли йиллар билан боғлиқ кўп заҳматлардан сочи оқарган шоирнинг ёшликка хос завқу шавқини сақлаб қолганига, бу завқу шавқни ёшлик ғайрати, оташи билан қоғозга кўчира олганига ҳавас қилса бўлади.

Шуҳрат аканинг шеърлари енгил ўқилади. Улар бари бир зарбда ёзилгани, бир қалб ҳолати заминида дунёга келгани сезилиб туради. Шеърлар, дастлабки таассуротда, жуда осон ёзилгандай туюлади. Лекин бу соддалик, равонлик ортида кўп оғир заҳматлар ётганини шеър меҳнатига ошна бўлганлар тушунадилар.

Қўлингиздаги китобни шоир олтмиш йиллик юбилейи арафасида нашриётга топширди. Топшира туриб: «Бу менинг укаларимга атаганим»— деди. Дарҳақиқат, жангчи — шоирнинг, Ватан урушининг ўт кўрасида бўлган, ўша «шинелли йиллар»нинг минглаб чақиримини солдат этигига ўтган адабнинг умр камолида ёшлар учун янги шеърлар китоби ёзиб бергани рамзий маъно касб этади. Бу шеърлар ёшларимизни ватанпарварлик руҳида, оталар қон тўкиб ҳимоя қилган қутлуғ маслагимизга садоқат руҳида тарбияламоққа ҳисса бўлиб қўшилади.

Шоир юрагига илҳом, ижодига маҳсул, умрига барака тилайман.

ЭРКИН ВОХИДОВ

## ЗАМОНДОШИМГА

---

Дунёни сен албат яратганинг йўқ,  
Сен фақат аждоддан қолган ёниқ чўғ.

Бу дунё бор эди бўлмоғи керак,  
Ҳозирдай бус-бутун қолмоғи керак.

Сен шунга жавобгар умринг борича,  
Кундузни кун дема, кечани кеча.

Бир ғишти бемаҳал нураса агар,  
Шаънингга афсусу надомат тегар.

Мабодо бирор ўқ отилса ногоҳ,  
Демак сен бўлмабсан вақтида огоҳ.

Нега у беватан ўз ватанида,  
Ғазабдан қутуриб қони танида?

Бировнинг юртида изғиб юрган ким,  
Нега сен жавобсиз туриб қолдинг жим?

Қелажак авлодга берасан ҳисоб,  
Ҳисобки саволи оғир, беҳисоб.

Ким эдинг, ким бўлдинг ва нима қилдинг,  
Бўлмаса дунёга нимага келдинг!

Ҳар куннинг ҳисоби алоҳидадир,  
Кечикмай ҳозирдан жавобин қидир.

Бош жавоб аниқдир гар бўлсанг зийрак,  
Дунё тинч ва бутун бўлмоғи керак.

Сен шунга жавобгар умринг борича,  
Белда куч, кўзингда нуринг борича!

1977, февраль



## **ОРЗУ ҲАҚИДА**

---

Мен орзумга етдим, дея керилма,  
Нима қолди энди ёниб дилингда?  
Нима кутар сени эрта йўлингда,  
Бўш хаёлга ўзинг алдаб берилма!

Қалбда доим орзу бўлса яхшидир,  
Уни қувиб яшаш яна яхшироқ!  
Бири битса, бошқасини топ, қидир,  
Йўлинг бўлур яна нурли ва порлоқ!

Орзу билан яшаган қалб равшандир,  
Орзу билан умр йўли гулшандир.  
Бу гулшандан ўзга тутма ўзингни,  
Юрагингга қулоқ солгин ва қондир!

Ишон дўстим, орзусиз қалб бўлмайди,  
Одам ўлар, аммо орзу ўлмайди!  
Бошқа қалбга кўчиб, севиб яшайди,  
Бахт уфқини доим қувиб яшайди!!

**1976, октябрь**

## ШОИР

---

Ким ўзи булар деб ёқангни тутма,  
Нур билан эзгулик фарзанди шонр.  
Шоирдан ёвузлик, ёмонлик кутма,  
Мард бўлсанг қалбига илҳом бўлиб кир!

Ҳар одам кўксига қулоғин қўйиб,  
Қалбининг уришин тинглайди нуқул.  
Нуқул у одамлар дардида куйиб,  
Одамнинг баҳти деб доим ўзи қул!

У дейди: оналар урмаса фарёд,  
Фарзанди устида сочини ёйиб.  
У дейди: йигитлар минганида от,  
Бу ҳаёт музида кетмаса тойиб!

У дейди: қизларнинг хандон кулгиси  
Бўғзида қолмаса йифиси босиб.  
У дейди: чаманлар муаттар исин  
Босмаса порохлар дудлари сасиб.

У дейди: ҳаттоки чумчук боласи  
Инидан бемаҳал тушиб кетмаса.  
Одам-ку ҳаётнинг асл, аълоси,  
Эътиқод мулкидан озор етмаса.

У дейди: гар севсанг, биттасига боқ,  
Никоҳнинг қасдига тушмасин талоқ.  
У дейди: гар оқсанг, дарё бўлиб оқ,  
Гул бўлсанг, майли бўл, ранг-баранг ёноқ!

Беш қитъа одамин қўлини ушлаб,  
Қўллари устига қўяди қўлин.  
Қалбидан қалбига тенг кўпrik ташлаб,  
Кенг, ёруғ кўради истиқбол йўлин!

У салом беради еру осмонга,  
У мадад кутади ёмғири қордан.  
У илҳақ сезади ўзин инсонга,  
У ҳиммат кутади доим дўст-ёрдан.

Аслида ўлимни тан олмас, лекин  
Бемаҳал ўлимдан соchlаридаги оқ.  
У иқбол истамас текиндан-текин,  
Ҳаётни кўради курашда порлоқ.

У ёлғон гапирса имони куйиб,  
Ақлига тушади бемаҳал куя!  
Эртани барчадан олдинроқ туюб,  
Қуённи қуён дер, туяни туя!

У ўзи ёнади ёндираман деб,  
Ёндириб ёнолса муроди ҳосил.  
Шоир ўз шахсига бермаса ҳам зеб,  
Зеб бериб оламга шод узил-кесил!

Сиз жиндек куйсангиз, у ёниб кетар,  
Сиз жиндек кулсангиз — солади хандон.  
Бу олам бўлсин деб бехавф, бехатар,  
Ўт-сувга уради ўзини ҳамон.

Сиз уни баҳтин кўрмоқ бўлсангиз,  
Тинч бўлинг, ғам-алам чекманг, одамлар.  
Шодликдан ёшариб, мамнун кулсангиз,  
У ерда доимо хушнуд қадамлар!

Сиз уни ардоқланг, азиз кишилар,  
У сизнинг кўзгунгиз сизнинг дилингиз,

У сизнинг бахтингиз, сизни олқишлиар,  
У ҳатто ўзингиз, бийрон тилингиз.

У сизни олқишилаб айтмоқда қўшиқ,  
Демакки, ҳаёт-ла у ошиқ-маъшуқ!  
Шу ошиқ-маъшуқлик унинг ҳаёти,  
Аслида ҳаётдир шоирнинг оти!!

1976, март  
Москва



## **ХАВОТИР ОЛМА, ОТАЖОН!**

---

Сен асло хавотир олма, отажон,  
Соҳибсиз қолмайди бу ёруғ жаҳон.  
Қонингда қонимдир,  
Дилингда дилим,  
Жонингдан жонимдир,  
Йўлингдан йўлим!

Мен яхши биламан сенинг дилингни,  
Мен жондан севаман шонли йўлингни.  
Ол байроқ остидан жилмадинг сира,  
Бахт нима — курашсиз билмадинг сира.  
Қўксингда изи бор душман қиличин,  
Майдонда кўрсатдинг йигитлик кучин!

Сен солдат шонининг қадрин биласан,  
Сен меҳнат ионининг қадрин биласан.  
Ленинни эшитган онинг бор сенинг,  
Ленинга тасаддиқ жонинг бор сенинг!  
Кўзингда ёнади шу тупроқ ранги,  
Қуёшдан порлоқдир оддий чечаги.

Дилингга маъқулдир шеъри, қўшифи,  
Шу юртнинг сен мағурур мангубошиғи!  
Ошиқсан қалби пок ва лафзи ҳалол,  
Беш юз йил яшасанг келмайди малол!  
Юрtingга ярашар қадди-қоматинг,  
Ўзингга муносиб баҳting-омадинг!

Қалбинг бор қордай оқ, баҳордай гўзал,  
Ез каби қайноғу, куздай серҳосил.  
Фикринг ҳам тиниқдир, тилларинг асал,  
Ниятинг тоза-ю, эзгу муттасил!  
Ибратдир дилинг ҳам,  
Йўлинг ҳам, ота.  
Сен севган жон фидо элинг ҳам, ота.

Сен ёққан чироқдан довонлар порлоқ,  
Довонлар ортида яна гўзал боғ.  
Шу боққа саломинг элтаман ўзим,  
Қасам деб қабул эт, ота, шу сўзим!  
Сен асло хавотир олма, отажон,  
Соҳибсиз қолмайди бу ёруғ жаҳон!

1977, январь



## КОМСОМОЛ МАДҲИЯСИ

---

«Аврора»нинг тўнғич ўғли,  
Жангда туғилдинг.  
Жангда ўсиб, жангда пишиб,  
Нурда йўғрилдинг.  
Октябринг бонги тиниб,  
Тикланди байроқ.  
Бу йилларда сенинг ишинг  
Яна ҳам порлоқ.  
Деҳқонга сен ер бўлишдинг,  
Сен ўзинг қўшчи.  
Заводини олди ишчи,  
Сен ўзинг ишчи,  
Янги ҳаёт изга тушди,  
Узгарди олам.  
Одам одам қадрин билди,  
Яшарди одам.  
Беш йилликлар довонидан  
Мардана ўтдинг.  
Юртга ҳар кун бир ғалаба,  
Бир ўлжа тутдинг.  
Юрт улғайди, эл улғайди,  
Улғайдинг сен ҳам.  
Дердинг мамнун: қандай яхши  
Яшнаса ўлқам!  
Днепрда чироқ ёқдинг,  
Оlam-olam нур,  
Турксиб узра йўллар қурдинг  
Шоҳона, мағур.

Ўз номингда шаҳар бунёд,  
Узоқ шимолда.  
Не-не ерга бердинг ҳаёт  
Аёз, шамолда.  
Не-не завод қад кўтарди,  
Қишлоқ яшарди.  
Ҳар звенонг ташаббускор,  
Бир иш бошларди.  
Сенинг ишинг даста-даста,  
Жилд-жилд китобдир.  
Ҳар соатинг бир достону  
Ҳар он бир бобдир.  
Мамнун эдинг тақдирингдан,  
Эл сендан рози.  
Бирдан оғиб кетди тонгда  
Тинчлик тарози.  
Ватан уфқин босди олов,  
Роҳат бузилди.  
Гўё баҳтнинг ҳаёт тори  
Ногоҳ узилди.  
Яна ўзинг шинелдасан,  
Елкангда милтиқ.  
Кўзларингда ғазаб ёнди,  
Чидаш йўқ ортиқ!  
Улим нима? Улимга сен  
Тикдинг ўзингни.  
Улим сендан тисарилди,  
Упди изингни!  
Не-не жангда жон талпиндинг,  
Ва ғолиб чиқдинг.  
Гастелло — сен, Матросов — сен,  
Тўйчи сен эдинг.  
Мардлигингга тараф йўғу,  
Ниҳоя йўқдир.  
Сенинг онинг, тирик жонинг  
Шонга тўлиқдир.

Жангда ғолиб, зафар олиб,  
Қайтдинг мағрур, шод.  
Тинчлик, ижод ва меҳнатда  
Бўлдинг қўш қанот.  
Яна бўз ер... яна завод...  
Ўқиш... тадқиқот...  
Номинг билан Гагаринни  
Кутди коинот.  
Ҳамон ўзинг белқувватсан,  
Музаффар халқа.  
Сенинг ишинг тизмалари  
Саноқсиз ҳалқа.  
Уфқларни кўзлаганда,  
Кўзинг шунқордир.  
Эл силаган пешонангни,  
Бахт сенга ёрдир.  
Бахтинг билан доим яша,  
Яша, комсомол!  
Сени кутар довон, чўққи,  
Уфқ, шонли йўл!!

1971.



## СЕНИНГ ШАЪНИНГГА, ҮЛҚАМ!

---

Ақлимни танибман — тепамда қүёш,  
Қаршимда яшнаган чаман — боғ кўрдим.  
Сафарга отлансам, ёнимда йўлдош,  
Ҳар ишда қошимда бир ўртоқ кўрдим.  
Илмга интилсам, мактаб эшигин  
Икқала қанотин ланг очиқ кўрдим.  
Уфққа талпинсам, истиқбол кўшкин  
Сатҳида ризқимни мўл, сочиқ кўрдим.  
Қир кезсам, йўлимда чечаклар — гилам,  
Тоғ кезсам, ҳар тошда бир лола кўрдим.  
Ҳар байрам оқшоми меҳри бир олам.  
Ҳар дўстим қўлида пиёла кўрдим.  
Бахтимни қўриқлаб жангларга кирсам,  
Бошимда муқаддас ол байроқ кўрдим.  
Бегона элларнинг тунида юрсам,  
Кремль юлдузин бир чироқ кўрдим.  
Учала ўғлимнинг кўзига боқсам,  
Бахтимнинг давоми аниқ кўринди.  
Баъзида турсам ҳам ёшликни қўмсаб,  
Истиқбол машъали ёниқ кўринди.  
Синчиклаб қарасам: бу она тупроқ —  
Мисқоли тенги йўқ гавҳар кўринди.  
Шаънимга пичирлаб куйлар ҳар япроқ,  
Ҳар кўчат шохига бир меҳрим қўнди.  
Чамалаб қарасам, бу улуғ юртим —  
Белига бир камар бўлмас ўн дарё  
Сувининг таъмини таққослаб кўрдим:  
Бундайин тотлигин билмаган дунё!

Венани мақташди, Венада бўлдим,  
Ахир у кечаги олам-ку мажруҳ!  
Қайтадан яшарган Самарқандни ким  
Венага тенг кўрса; унинг диди йўқ!  
Тунингдек юлдузли осмон кўрмадим,  
Ватаним, елингдай хушбўй, юмшоғин.  
Бир жаҳон олтингга алмашмас эдим,  
Бир харсанг тошингнинг кичик ушоғин!  
Бир он ҳам меҳрингсиз олмасдим нафас,  
Қаерда бўлмайин, эй, она ўлкам!  
«Фарзандим!» демагинг менинг учун бас,  
Жонимни тиксам ҳам сенинг учун кам!

1960



## ЁШЛИК БАХТИ

---

Ёшлигинг бахтини билмоқ истасанг,  
На кўкдан изла-ю, на уфққа боқ.  
Ёшлик у бир қилич,  
Бостирмасдан занг  
Истиқбол жангига кира бил, ўртоқ,

Шу йўлда ўқиши ҳам, меҳнат ҳам зўр жанг,  
Ният қил: — Курашда очилса кўзим.  
Шу йўлда қалбингдан севиб севилсанг,  
Шу бўлур ёшлигинг бахти, азизим!

1962



## ҚИЗИЛ МАЙДОНДАН ЎТГАНДА...

---

Эй, менинг илинжим, қиблаи олам,  
Тонг билан хаёлим сенда кезади.  
Сен билан тақдирин боғлаган одам  
Ўзини дунёда масъуд сезади.

Дарёлар денгизга, гиёҳлар нурга,  
Лочинлар уфқа интилгансимон,  
Сен сари ошиқар жумлаи жаҳон.  
Бу башар муштоқдир сенингдек ерга.

Мен эса, илк бора сендан ўтганман  
Партизан дадамнинг кифтига миниб.  
Меҳримни гул қилиб сенга тутганман,  
Гоҳ мағрур шодланиб, гоҳо қимтиниб.

Қийқириб боққанман узоқ-узоққа,  
Қалбимда қувончим бир дунё эди.  
Ёнимда одамлар бир дарё эди,  
Мен эса ўхшардим кичик ирмоққа.

Уша илк дафъанинг завқи қалбимда,  
Уша илк кўрганим лавҳа эсимда.  
Байроғи нур бўлиб ёнар кўзимда,  
Қўшиғи янграйди ҳамон лабимда.

Гўёки у замон ичгандим қасам:  
Шу куннинг шаънига умр бахш этсам!  
Бахш этган умримни энди эсласам,  
Арзиди бошқалар ибрат олса ҳам!

Улғайдим пионер лоласин тақиб,  
Гердайиб қошингдан ўтдим ҳар байрам.  
Гул сочдим бахтимдан олам ва олам!  
Ҳар байрам Ленинга миннатдор боқиб,

Тўлқинлар ўтарди байроқлар қалқиб,  
Уфқни тутарди «урра» қийқириқ.  
Уфқлар ортида яна нур балқиб,  
Гўё бу садолар эди чақириқ!

Лаббай деб шу садо ортидан бордим,  
Шу тақдир ҳукмига бердим ўзимни.  
Бахт боққан манзилда кўрдим ўзимни,  
Ва шунда қилт этмай мангуга қолдим!

Арқонга қил қувват, мен эса юртга,  
Юрт эса бошимда бўлди соябон.  
Бир лаҳза бокмадим ноумид кетга,  
Олдинда кутарди жанг-жадал, довон.

Улғайдим, уйландим, фарзанд ҳам кўрдим,  
Қўлида байроқча, елкамда ўзи,  
Кўксингдан ўтаркан, ёнарди кўзи!  
Шу ёнган кўзининг постида турдим.

Шу ёнган кўзининг ҳаққи-ҳурмати,  
Меросга қолади мендан эътиқод.  
Юрагим бир лаҳза дардсиз турмади,  
Бу дарднинг матлаби ишонч ва ҳаёт!

Эй, менинг ишончим, қиблай жаҳон,  
Мен сенинг меҳрингсиз нафас олмадим!  
Десангки, уч-тўрт бор сени кўрмадим,  
Мен бунга сабабмас, ўзингга аён!

Ишонки, қошингдан ҳар йил икки бор  
Таъзим-ла ўтмоқлик имоним бурчи!

Бири кеч кузакда, бири навбаҳор,  
Иккисин баробар эъзозли кучи!

Ҳар сендан ўтганда бағрим кеңг очиб,  
Умримни қиласман бир-бир сарҳисообщ.  
Умрки, ҳар тонгда бир зафар қучиб,  
Тарихга қўшади янги-янги боб.

Умрки, ҳавасга кўз-кўз қилгудек,  
Қон билан, шон билан кўтарган қаддин.  
Умрки, ҳавас-ла ўқиб билгудек  
Ким кутса тақдирдан эрку омадин.

Эй, жаҳон жамоли,  
Эй қизил майдон,  
Яна мен таъзим-ла сендан ўтаман.  
Ва сендан ўтмоқни  
Таъзим этмоқни  
Келажак авлодга мерос тутаман!

1977, февраль.



## **БИР КОСА ШАРБАТ**

---

Қўлларимда бир коса шарбат,  
Сенга олиб бораман, эркам,  
Токи қалбинг билмасин ғурбат,  
Тарк этмасин руҳингни кўклам!

Эсмай туринг бирпас, эй еллар,  
Чайқалмасин шарбат қўлимда.  
Текис бўлса шояд бу йўллар,  
Тош бўлмасин яна йўлимда.

Гапга солманг мени ногиҳон,  
Хаёлимни бузманг, эй ёрон!  
Бу косада бир олам-жаҳон  
Яхши ният ва орзу-армон!

Томчиси ҳам бўлмасин нобуд,  
Мен кетяпман, эркам, мени кут!

**1977, февраль  
Ашхабод**



## **ОНАМ, ОНА ТИЛИМ, ОНА ЙОРТИМ**

---

### **I**

Дунё кўрдим, эл-юрт кездим бир талай,  
Биттасида худо рамзи онадир.  
Биттасида она кўзи қуралай,  
Ҳу биттаси баҳт дардида ёнади.

У биттаси боласини опичлаб,  
Шоликорда куни бўйи гиргиттон.  
У биттаси дунё сочар ҳовучлаб,  
Ёлворгани оллоҳ бермас битта жон!

У биттасин манглайида тилла хол,  
У биттасин кўзи қисиқ, ёнган чўғ.  
У биттасин илк баҳорда навниҳол,  
Ҳуснидан маст, дунё билан иши йўқ!

Ҳаммасини кўрдим, билдим, хўп яхши,  
Ҳаммасининг ўз хислати, ўз кўрки,  
Ўз жамоли, ўз қалби бор, ўз ёши,  
Ўзгачадир майшати, баҳт, эрки!

Энди ёйлар ҳаммасидан меҳрибон,  
Ҳаммасидан чиройлиги ўз онам!  
Меҳри жаҳон, жаннат макон, фидожон,  
Олам ичра қиёси йўқ бир олам!

## II

Бирор мақтаб францизлар тилини,  
Оҳ-оҳ, — деди, — нафосатда тенги йўқ.  
Немис тили жаранглашда сўнги йўқ,  
Билсанг тилин, яқин тутар дилини.

Яна бири тилларидан бол томиб,  
Испанчани мақтаб қолди, ўрган деб.  
Шекспирдан сонет ўқиб, нур эмиб,  
Бу тил, деди, барча тилга кўрку зеб!

Хитой тили ажойиб тил, кўриб қўй,  
Ёзуви-чи, ёзув эмас бир сурат.  
Беш минг йиллар тарихига чўзсанг бўй,  
Шу тил берар аниқ-тиниқ кафолат!

Лотин тили ўлик халқдан тирик тил,  
Илму фанда қад-қомати баркамол.  
Ростим айтсам, барчаси ҳам йирик тил,  
Барчаси ҳам яхши, кўркам, тоти бол!

Лекин менинг она тилим баридан  
Ширин-шакар, улкан, азиз, баҳодир.  
Сержилва-ю, теран фикр қаъридан  
Мўъжизалар кашф этмоққа у қодир!

## III

Римни кўрдим: кўҳна олам, ҳар тошда  
Ақл меҳри, қуллик заҳри мужассам.  
Париж эса, минг товланиб қуёшда,  
Жозиба-ю, нафосатни қилмиш жам!

Япония ажиб ўлка, ҳар гиёҳ,  
Ҳар қарич ер хунига тенг, режада.

Тожмаҳални кўрганмисиз бирор чоғ,  
Кундуздан ҳам чиройлидир кечада!

Юртлар кўрдим, дарё-кўли беҳисоб,  
Юртлар кўрдим, тоғи осмон устуни.  
Биттасини тарқ этмайди ҳеч офтоб,  
Биттасини ярим йилдир ҳар туни!

Яна бири... Хуллас калом ҳар бири  
Ўз ҳуснига мафтун этар ўзгача,  
Шайдо этар дилдан тортиб кўзгача!  
Ҳар бирининг ўнта китоб таъбири!

Анчасини кўрдим, лекин барча юрт  
Ўтаверсин она юртим олдидан!  
Она юртим қандай гўзал ва жўмард,  
Қандай азиз, баҳодирсан, эй, Ватан!

#### IV

Она! Сенинг номинг шунча мўътабар,  
Шунча азиз, муқаддасу сержаранг.  
«Она тилим», «Она юртим» — бир қаранг,  
Қандай тотли, қандай шонли ва лобар!

Сен бўлмасанг иккиси ҳам оддий сўз,  
На юракка тўлқин солар, на ғурур.  
На ўзгача жилва билан ёнар кўз,  
На уларга жило берур баҳт, сурур!

Сен дунёниг боши билан охири,  
Меҳринг билан дунё яшнаб яшарса,  
Не ажабки, қаҳринг агар тош ёрса!  
Кел ўпайин пешонангдан, кел бери!

Кел, онажон, ажин босган қўлингни  
Муқаддас деб кўзларимга суртайин.  
Она тилим! Она юртим! Дилингни  
Мен билмасам ким билади мендайин!

Сизлар борки, дунё кўрки кўзимда,  
Сизлар борки, шон-шараф бор сўзимда,  
Сизлар мангу, мен-ку ўтиб кетарман,  
Ташаккурим янграб қолур изимда!!.



## ШОШМА, ЭЙ БУЛОҚ!

---

— Турна кўзли, эй булоқ,  
Сўзларимга сол қулоқ:  
Бунча қайнаб тошасан,  
Қайга бунча шошасан?  
— Йўлга чиққан сайёҳ бор,  
Сувга ташна нигоҳ бор,  
Балки кутар дил ёниб,  
Ичсин сувим у қониб.  
— Тўйиб ичгач, у яна —  
Бўлар йўлга равона.  
Сени эслар, ёки йўқ!  
— Бунинг менга фарқи йўқ.  
Чанқовини боссам бас,  
Эсламоги шарт эмас!

1977 йил, февраль  
Ашхабод.



## МЕН ТАНЛАГАН ЙУЛ

Мен умр йўлининг зиналаридан  
Баландга чиқмоқни аҳд қилганим он,  
Кўзимга кўп гўзал кўринди жаҳон.  
Кўш қўллаб ушладим меҳнат баридан.  
Белларим қайишди,  
Қўлларим толди.  
Кўзларим гоҳида тиниб кетса ҳам,  
Умидим узмадим,— тиришдим маҳкам.  
Ниятим йўлдошим бўлди — куч олдим.  
Мен енгил обрўни қилмадим ҳавас,  
Ё сохта мақтовга учмадим дарров.  
Билардим баъзида дўстим бўлиб ёв,  
Йўлимга ташлайди гул ўрнида хас!  
Мен ҳаёт завқини меҳнатда тотдим,  
Ҳа, оғир меҳнатнинг завқи ўзгача.  
Кўзимга чўккунча қоронги кеча,  
Умримни шу йўлда ўқ қилиб отдим.  
Биламан асабим бевақт титилур,  
Жонимга bemavrid ажал тикар кўз.  
Биламан ўз ўрнин топиб тушган сўз  
Асабдан, юракдан чақнаб битилур.  
Мен атай шу қийин йўлни таnlадим,  
Ҳа, нурли чўққида чиқар манзилим.  
Етишим кўп мушкул ва лекин дилим  
Дейдики, ташлайвер ишонч-ла одим.  
Ишончинг бўлмаса силжима, жим тур,  
Ишончнинг инъоми роҳат бўлади.  
Ким оғир яшаса енгил ўлади,  
Хаттоки қабрида ётади мағрур.

1970.

## **АЙТ-ЧИ, ҚИЗ**

---

Мен сени биламан: қулишинг гўзал,  
Қаҳқаҳа бобида танҳосан ўзинг.  
Сен кулсанг тилга ҳам киради ғазал,  
Кулади вужудинг, юрагинг, кўзинг?!

Бу яхши хислатдир, гулим, албатта,  
Юракдан астойдил кулмоқ қувониб!  
Айт-чи, қиз, кулгандек оғир дамларда  
Йиғлай оласанми ўртаниб, ёниб!

Агар йиғлай олсанг яна ҳам яхши!

1960.



## АСТИ СҮНМАС НУР

---

Мен сизни биламан, онажонларим,  
Опажон, сингилча, жонажонларим.

Асрлар қаъридан мунгингиз келур,  
Ҳар ғазал қатида кўнглингиз келур.

Гоҳ Лайли, гоҳ Ширин, гоҳ Барчин бўлиб,  
Қалбингиз шишаси чилпарчин бўлиб,

Минг варақ достонни ҳўл-кўл қилгансиз,  
Инсонлик қадрини инсон билгансиз.

Пўлатдан мустаҳкам, тошдан қаттиқсиз,  
Сахийлик бобида кундан ортиқсиз.

Меҳрингиз зарраси олам ёритар,  
Меҳрингиз шуъласи одам яратар.

Оламнинг боши-ю, охири сизсиз,  
Энг буюк нақоши — моҳири сизсиз!

Сиз боққан уфқнинг тонгида кун бор,  
Сиз севган инсоннинг онгида кун бор.

Сиз инсон қонида юрган қуёшсиз,  
Ҳар кунжак, хонага кирган қуёшсиз!

Сувдаги жилва ҳам, гулдаги ранг ҳам,  
Гўдак табассуми, кулги, оҳанг ҳам —

Сиз борки, оламда маъно кашф этар,  
Сиз борки, оламни доно кашф этар.

Сиз кирган хонанинг файзи ўзгача,  
Баҳори беқиёс, ёзи ўзгача.

Сиз юрган боғларининг атри ўзгача,  
Ғазалхон шонранинг сатри ўзгача.

Ҳар юрак тўрида сизнинг меҳрингиз,  
Ҳар гўдак кўзида сизнинг сеҳрингиз.

Сиз унинг кўнглида мангу виқорсиз,  
То умри барқарор тилида борсиз.

Кўйида, ўйида, дилида борсиз,  
Бахтлилар ичида энг баҳтиёрсиз.

Ҳар фарзанд тилида сизга ташаккур,  
Сиз мангу қуёшсиз, асти сўнимас нур!

1957.



## БУ ДАВР ШУНАҚА...

---

Сочингга уч-тўртта оқ тола тушса,  
Сен уни яшириб олиб ташлабсан.  
Бугун-ку илож бор — юлиб ташлабсан,  
Эртага неилож — бирдан ёпишса!

Яхиси тегма, қўй, оқарсин майли,  
Шу учун севмаса, севмасин қизлар.  
Нималар кўрмади бу қора кўзлар,  
Биз умр кўрмадик текис, бамайли!

Гагарин фазода бир соат юриб,  
Соф-омон тушгани бир олам маъно;  
Шу маъно етилиб, ақлда эриб,  
Оқ сочга айланган не-не ёш доно!

Чўл қувган йигитнинг бошидаги оқ,  
Оқ эмас, қирларнинг нурафшон чанги;  
Сочида у севган пахтасин ранги,  
Кўнглида у қурган ГЭСлардан чироқ.

Тошкентга қарагин — янги бир олам,  
Пастқам уй, илониз кўчалар қани?  
Ана шу йўлларда неча минг одам  
Сочида йўқотди нурли қорани!

Бу давр шунақа... соати йилни,  
Йиллари асрни забт этиб олган.  
Ана шу даврда ўт олган дилнинг  
Куллари бош узра сочилиб қолган.

Бу давр шунақа: умр сермаъно,  
Серташвиш, асабий, шунча учқурки...  
Мана шу даврда эллиқда қора —  
Соч билан яшамоқ ўзи бир кулги!

Қалбингда ўт ёқиб, кулини бошга  
Сочганча юравер қувониб, ўртоқ.  
Юравер тик қараб нурли қуёшга,  
Ҳали биз боражак манзиллар узоқ!

Манзиллар узоғу ва лекин порлоқ,  
Ўкинма сочингга ораласа оқ!

1976, март



## УМР ЙЎЛДОШИМГА

---

Ёшлигим тонгида сени учратдим,  
Шу, — дедим кўкимда ёруғ юлдузим.  
Умримни гул каби қўлингга тутдим,  
Эй, умр йўлдошим, қуралай кўзим!

То катта тош йўлга чиқиб олгунча  
Озмунча сўқмоқлар босиб ўтмадик!  
Озмунча бўлмади юлдузсиз кеча!  
Барига ишонч-ла боқа олдинг тик!

Энди-чи, уч ўғил, бир қизимиз бор,  
Сен — она, мен — ота баҳтиёр, мағур,  
Умримнинг тонгидан бўлиб миннатдор,  
Истиқбол уфқига боқаман масур!

Гар бирор севгидан савол сўрайди,  
Номингни такрорлаб «шу баҳтим» дердим,  
Мабодо яна бир умр кўрсайдим,  
Ионки, шунда ҳам сени севардим!

1960—1965

## ТОШБАҚА

---

Дунёдаги энг қари тошбақа  
Лондон зоопаркида яшайди.  
У уч юз йил умр кўрган.

Тошбақа яшапти уч юз йил,  
Уч юз йил оламда турипти.  
Юз йилча саҳрода юрипти,  
Қолгани катакда, тутқундил.

Қатакдан боқибди маъюс у,  
Одамлар томоша қилипти.  
Гўёки бегуноҳ, маҳбус у,  
Эрксизлик нимадир билипти.

Минг бора лаънатлаб дунёни,  
Бошини тошларга урипти.  
Юз йилча яшаган саҳрони  
Ҳар куни тушида кўрипти.

1971.



## ЁШЛИК ВА ЁШЛАР ҲАҚИДА

---

Ёшликка ярашар ўйин-кулги ҳам,  
Ёшликка ярашар севги билан май.  
Чироқсиз тунларнинг сиёҳ кўрки ҳам,  
Узоқда янграган ногораю най.

Ёшликка ярашар олис йўл, сафар,  
Йўл бўйи қурилган капаю гулхан.  
Ёшликда бахтини қидирган топар,  
Муродга етади қадрини билган.

Кексадек муккайиб ўтиrsa доим,  
Гўзаллик завқини тотмаса ёниб,  
Ким уни ёш дейди, қани айтинг, ким,  
Ким уни дўст тутар ёнига олиб?!

Ёшмисан, демакки, олов бўлиб ён,  
Ён токи ёришсин олис-олислар.  
Қизларнинг қалбига тушиб ҳаяжон,  
Завқидан адашсин оғзида сўзлар.

Ёшликда гулларнинг кўрки бошқача,  
Бошқача анқийди ҳатто атри ҳам.  
Ўзгача шавқ билан қорайиб кеча,  
Ўзгача янграйди шоир сатри ҳам!

Ёшликда шўхликлар айбга саналмас,  
Шўхликсиз ёшликнинг дафтари чала.

Зеҳни-чи, кесади мисоли олмос,  
Фикрини айтади ошкор, баралла!

Ёшликка ярашар ҳатто бўз кўйлак,  
Ёшликка ярашар тонготар базм.  
Ёшликда бошқача уради юрак,  
Баъзида ҳеч кимдан сўрамас изн!

Ёшликда ёшликнинг ўз қилиғи бор,  
Қатталар кўзида балки нуқсондир.  
Шу нуқсон бўлмаса ёшлиги ноchor,  
Ёшлиги ўксийди, ер-ла яксондир!

Қатталар! Ёшлардан ўксинманг ноҳақ!  
Таънадан тилингиз тийинг, илтимос.  
Ёшликда сизлар ҳам бўлгансиз шундоқ,  
Энди-чи, унутиб қўйгансиз, холос!

Ёшликнинг ўз даври, ўз шиддати бор,  
Ўз дарди, ўз фахри, ўз кашфиёти.  
Қиз севса, тунларни ўтказар бедор,  
Йўл юрса, чарчашни билмайди оти!

Қулганда уфқа солади ларза,  
Ииғласа, дўл бўлиб тўкилар ёши.  
Жанг чоғи ёвига чанг солиб борса,  
Ажални қўрқитар зарби, бардоши!

Сен унинг бўз ерда хирмонига боқ,  
Космосга илк учган уларнинг ўзи.  
БАМдаги ишига солгин-чи қулоқ,  
Сув бўлиб эриди Сибирнинг музи.

Ёшликка не етсин! Жаҳон устуни,  
Умрнинг безаги, кўрки, тираги.  
Улуғланг ёшликнинг олтин дастини,  
Бекиёс хазина қайноқ юраги!

Ёшларга қойилман, ёшлар бутун ҳақ,  
Замонга ярашиқ юриш-туриши.  
Замоннинг талаби дилида байроқ,  
Уларнинг қўлида эртанинг иши!

Ёшлигим! Мен сендан ризолик олиб,  
Вақт етиб, кексалик боғига ўтдим.  
Бари-бир юрагим ўзингда қолиб,  
Қулоғим ҳамиша йўлингга тутдим.

Сен жангга кир дединг, кирдим мардона,  
Бошимда каскаю оёқда этик.  
Уч бора ярадор бўлсам ҳам, мана,  
Амрингга бош эгиб турибман тетик.

Саҳрога сув керак! — сен қилдинг имо,  
Мен канал етаклаб кетдим ортингдан.  
Еч дединг, мен ечдим неча муаммо,  
Ташаккур ёғилди она юртингдан!

Сен чўлга юр! — дединг, мен лаббай, дедим,  
Сен кўкка уч! — дединг, қанот боғладим.  
Мен сенинг измингда бир солдат эдим,  
Солдатдек ҳар ишга ўзни чоғладим.

Ўзгага юк бўлиб ҳаёт кўрмадим,  
Бошқалар юкини кўтардим лекин.  
Шарафга чулғаниб турса-да, отим,  
Қаҳқаҳа урмадим, жилмайдим секин.

Бир қўлда гул тутғаб, бир қўлда режа,  
Қафтингда кўтариб юрдинг ардоқлаб.  
Биз юрган йўлларда ёришди кеча,  
Яшадим ишончу лафзингни оқлаб.

Қиз севдим, сен ўзинг турдинг олқишилаб,  
Тўйимни қиздирган сенинг чилдирманг.

Энди-чи, юрибман набира бошлаб,  
Дейманки, кўрмасин улар уруш, жанг!

Ёшларга боқаман мамнун ва мағрур,  
Уларнинг сафида фарзандларим бор.  
Барига тилайман олам-олам нур,  
Кўзида кўраман истиқбол, виқор!

Қадамин гумбури қалбимга яқин,  
Қаҳқача, кулгуси жонимга роҳат!  
Инграса, кўксимда сезаман ўқин,  
Қалби бўш, лоқайдга қилмайман тоқат!

Шон-шараф қучганча жондан қувониб,  
Ташуккур айтгани сўз тополмайман.  
Ёнида борардим қўлини олиб,  
Кетидан қувгани... оҳ, чополмайман!

Илғорлаб кетибди! Бор бўлсин, оқ йўл!  
Ортидан боқаман силкиб-силкиб қўл.

1976, декабрь.



## ЮҚОРИГА ЎР

---

Сен пастга бошлама, юқорига торт,  
Гар пастга тушмоқлик енгилроқ анча.  
Биламан паст текис ва силлиқ асфальт,  
Ен-вери теракзор бора-боргунча!

Лекин сен паст эмас, юқорига юр,  
Гар тиззанг қирилиб, белинг толса ҳам,  
Хуржунда бир бурда ионинг қолса ҳам,  
Олға юр ҳар нафас, юқорига юр!

Юқори чиқмоқнинг гашти ўзгача!  
Ўзгалар йўлини қилмасанг тақрор —  
Янада яхши-ю, оғирдир пича.  
Шу оғир йўллардан мағрур ва тик бор!

Мард юрса тоғларнинг тоши юмшоқдир,  
Мард юрса чўққилар келади яқин.  
Чўққидан бу олам яна порлоқдир,  
Бу олам кўркига юксакдан боқинг!

1976, декабрь.

## ҲАМИША ЙЎЛДАМАН

---

Ҳамиша йўлдаман, йўлларим олис,  
Йўлларим паст-баланд, тўғри ва эгри.  
Баъзида юксакка чиқсан шилиб тиз,  
Баъзида қир ошиб кетаман нари.

Йўлдаман, илк қадам қўйгандан бери,  
Манзилдан кўзимни узмайман сира.  
Манзил-чи, йилдан-йил кетади нари.  
Йилдан-йил баҳш этиб завқу шарора.

Баъзида етгандай бўламан унга,  
Баъзида жуда ҳам кетгандай узоқ.  
Бирида ўйимни буркаса тунга,  
Бирида қувончдан қора ранглар оқ!

Биламан, ҳаётнинг қонуни кўпdir,  
Ҳаммасин олдидан билиб бўлмайди.  
Билганинг сеники, билмаганинг сир,  
Шу сирни билмаса кўнгил тўлмайди.

Эртанинг сирлиги менга ёқади,  
Эртанинг сир бўлиб тургани яхши.  
Кишининг қалбида умид ёқади,  
Олдинга ундайди сирли боқиши!

Шу ундов ҳамиша менинг йўлимда,  
Шу ундов ҳамиша мадад дилимда.

Мен унга интилиб йўлим босаман,  
Севинчим қалбимда, баҳтим йўлимда.

Йўлдаман илк қадам қўйгандан бери,  
Ҳаётни орзиқиб суйгандан бери.  
Манзилим олисдир, юксак ва порлоқ,  
Эй, умрим, йўлингга масъул бўлиб боқ.

1976, ноябрь.



## ЎҚИНМА ҲЕЧ

[Уғлимга]

Сен туғилдинг яхши фурсатда,  
Тўп ғилофда, қилич қинида,  
Мардоналар қайтган шаҳрига,  
Севинч мавжи дил тўлқинида.

Баҳор кўрки ўлкада мавжуд,  
Келажакнинг умиди дилда.  
Тинч, баркамол ҳаёт қўшиғи  
Қалдан чиқар жўш уриб тилга.

Жанг йиллари белимда қувват,  
Шууримда сен яшар эдинг.  
Тасодифдан қилдим ҳимоя,  
Ўзимни-ю, сенинг қисматинг.

Кўз ўнгимда эдинг-у, аммо  
Билмас эдим фақат исмингни.  
Мана энди туғилдинг, сенга —  
Исм қўйдим, кўрдим ҳуснингни.

Улгаярсан, ҳаёт ва мамот  
Жангларида бўлмассан балки.  
Балки бизга келар ҳавасинг,  
«Кеч туғилдим!» — нолирсан балки.

Гар жангларда туғ ушламасанг,  
Ўқинма ҳеч, қайтурма зинҳор.  
Бу ҳаётда кеч туғилиш йўқ,  
Ҳар умрнинг ўз ҳиссаси бор!

1948.

## ҚҮФИРЧОҚ

---

Қўғирчоқ келтирсам ўйнайди қизим,  
Бағридан қўймайди то ётгунича.  
Қўғирчоқ кулади гоҳ очиб кўзин,  
Гоҳ кўзин юмади хўмрайиб пича.

Қўғирчоқ ўйнамоқ яхши бир эрмак,  
Қизим ҳам севади,  
Менга ҳам ёқар.  
Ва лекин қўғирчоқ одамни кўрмак,  
Рост айтсам, дўстларим, бағримни ёқар.

1971.



## **ЧИРОҚЛАР ЁНАРДИ ХИРА**

---

Қирқ бирда отамни кузатдим тунда,  
Чироқлар нечундир ёнарди хира.  
Шу тунни тушимда кўраман кунда,  
Ҳали ҳам эсимдан чиқмайди сира.

Биз қолдик, у кетди,  
Ҳамон кетади.  
Уруш ҳам тугади,  
Ҳамон йўқ дарак.

Шу поезд ҳали ҳам тунда ўтади,  
Ҳали ҳам шу тунга интилар юрак.  
Ҳали ҳам чироқлар ёнади хира,  
Эсимдан чиқмайди шу поезд сира!!

1977 йил, февраль.



## СЕН БУНДА ЁТАСАН...

---

Дунай бўйи мамлакатларида Улугъ<sup>+</sup>  
Ватан уруши йилларида қурбон бўлган  
ўзбек жангчиларига.

Сен бунда ётасан юрtingдан йироқ,  
Юрtingнинг меҳри-чи, сен билан бироқ.  
Баҳорда гул очар сени соғиниб,  
Ёзида гул сочар сени соғиниб.  
Кузида сен учун осади узум,  
Қишида қор билан ювади юзин!  
Баҳорда ток очса хаёлида сен,  
Эрталаб гул узса хаёлида сен.  
Кечқурун ош сузса хаёлида сен,  
Қўшнида тўй бўлса хаёлида сен,  
Меҳмонга уй тўлса хаёлида сен.  
Сен бунда ётасан совуқ ер қучиб,  
Хаёлинг юради дилма-дил учиб!  
Онангнинг уйида ҳамон тириксан,  
Хотининг куйида ҳамон тириксан.  
Боғларинг кўркида ҳамон тириксан!  
Гулларинг баргида ҳамон тириксан!  
Тириксан юрtingнинг баҳор, қишида,  
Тириксан дўстларинг қутлуғ ишида.  
Дўстларинг эслайди улоқ чопганда,  
Хотини йўлга деб кулча ёпганда.  
Дўстларинг эслайди гурунг қурганда,  
Ҳовлида чиллаки чумак урганда.  
Дўстларинг эслайди қовун узганда,  
Дўстларинг эслайди шароб сузганда.  
Дўстларинг эслайди ёққанида қор,  
(«Оҳ, бирга кезардик тун бўйи бедор!»)  
Дўстларинг эслайди фарзанд тўйингда,

Хотининг ёнганин кўриб кўйингда  
Дўстларинг эслайди байрам кечаси,  
Руҳингга май ичиб неча-нечаси!  
Сен бунда ётасан жуда олисда,  
Ҳаётинг давоми ҳар ўғил-қизда.  
Сен улар бахти деб, жангга киргансан,  
Сен улар бахти деб, ёвни қиргансан!  
Сен улар бахти деб, қон кечиб юрдинг,  
Ўз жонинг кўзингга кўрингани йўқ!  
Сен улар бахти деб, қон кечиб юрдинг,  
Ўзингни бўрону ўтларга урдинг!  
Сен улар бахти деб, шон олгансан, шон,  
Сен улар бахти деб, бўлгансан қурбон!

Сен бунда ётасан юртингдан йироқ,  
Юртингнинг меҳри-чи, сен билан порлоқ,  
Юртингдан мен сенга салом келтирдим,  
Севикли тилингда калом келтирдим.  
Гул экдим бошингга юртдан келтириб,  
У тургай қишу ёз яшнаб, қулф уриб.  
Бош эгдим қабрингда тиззамни букиб.  
Лаънати урушни қоралаб, сўкиб!

1962.



## ЮЗ МИНГЛАР МОЗОРИ

Севастополда «Юз минглар мозори» бор.  
Унда урушларда қурбон бўлган 127583 киши  
дафн этилган.

Ен дафтардан.

Юз минглар мозори! Юз мингта қабр!  
Юз мингта инсоннинг жасади бунда.  
Болам деб, болам деб, кутган бесабр  
Онанинг армони кезади бунда.

Бундадир юз-юз минг етим-есирнинг  
Ёшидан нам бўлган табаррук тупроқ,  
Бундадир бешафқат, золим асрнинг  
Қоп-қора тунида ёнмаган чироқ.

Бундадир ёрига бир тун қовушмай,  
Қон қусган бенаво, навқирон ёшлик.  
Бундадир бир умр отидан тушмай  
Қиличлар ўйнатган ўт-бўрон ёшлик!

Бундадир фарзанди меҳрига қонмай  
Кўз юмган отанинг муқаддас қабри.  
Бундадир қиз севиб, ишқида ёнмай  
Бемаҳал ўқ тешган йигитнинг қалби.

Бундадир тупроққа қоришган тилак,  
Бундадир бўғзида қолган ашула.  
Бундадир орзуга етмаган юрак,  
Мангуга босиқдир совуқ тош ила!

Бундадир Ватани нимаки деди,  
Лаббай деб бажарган ҳалол хизматин.

Бундадир... о, барин санаб бўлмайди,  
Санаб бўлмагандек инсон хислатин!

Хулласи, бу ерда юз мингта шаҳид,  
Юз мингта мард солдат — қурбон ётади.  
Урушни лаънатлаб юз мингта йигит,  
Мангу бир тинчликни талаб этади!

Тингла эй, уларнинг нидосин, жаҳон.  
Қурбонлар ҳеч қачон ёлғон гапирмас!  
Уларнинг сўзига кирмаган инсон,  
Рост айтсам, дўстларим, чин инсон эмас!

1962,  
Крим.



## СЕН БАЪЗАН...

---

Сен баъзан ёшимни сўраб қоласан,  
Баъзида бошимга тикиласан жим.  
Сочимнинг оқидан ўйга толасан,  
Ҳа, рост-да, ёшликни ким севмайди, ким!

Балки сен ўйларсан: бевақт тушган оқ  
Кўнгилнинг армони, умрининг доғи.  
Рост айтсам, эй дўстим, ҳеч ўқинчим йўқ,  
Ҳамиша тип-тиниқ кўнглим чироги.

Дейдилар, у менга ярашар эмиш,  
Майлига, ҳаттоқи ярашмаса ҳам.  
Оқлиги кўнглимга солмайди ташвиш,  
Оқлигин гашти ҳам ўзи бир олам!

Гар сочим қорасин кўрмоқ истасанг,  
Уч ўғил бир қизим бошларига боқ.  
Сен менинг бошимдан излаганинг ранг,  
Уларнинг социда ёнади порлоқ!

Мен улар қалбига нур бўлиб кириб,  
Умрини умримга пайванд қилганман.  
Сочимнинг қорасин уларга бериб,  
Оқини ўзимга олиб қолганман!

1962, 27 май.

## **ИНТИЛИШ**

---

Уфқим бор. Уфқимга қараб интилсам,  
Ортига чекиниб, кетиб боради.  
Мабодо мен ортга қайтгудай бўлсам,  
Кетимдан қувалаб етиб юради.

Уфқни қувламоқ одамнинг иши!  
Уфқقا қувлатиб юрма ўзингни,  
Иўқотиб қўясан борар изингни!  
Доимо ютади интилган киши!

1976, март.  
Москва.



## УЧ-ТҮРТТА ОҚ ТОЛА

Соқол оқи ўлимга пешровдир,  
Тириклик сабзаси узра қировдир.

Н а в о и й.

Уттизга етмасдан ўғил сочида  
Уч-түртта оқ тола йилтиллаб қолди.  
Онаси кўрди-ю, куйиб ичида  
«Наҳотки...» деди-да, оғир тин олди.

Кун кеча эди-ку ҳовлида аста  
Эмаклаб юргани этаги боғлиқ!  
Наҳотки, ёшлиги ўтди бирпасда,  
Наҳотки, ҳаёти қолмиш саноғлиқ!..

Ўғлининг сочиға тушганда кўзи  
Юраги зирқираб кетар ҳар сафар.  
Ўзининг оқ сочи, ажинли юзи,  
Мункайган қаддидан бугун бехабар!..



## ОТАШ

---

Оташ деб ўғлингга қўйибсан исм,  
Оловдек гуриллаб ёниб турсинми?  
Ё ундан нур олиб бу кекса кўзим  
Чарақлаб порласин деганинг чинми?

Ё қизлар ишқидан эҳтиёт тутиб,  
«Тақилманг, ёнасиз!» деганингми бу?  
Ё қора тунларни тарки жон этиб,  
Дедингми ҳаётда мўл бўлсин ёғду!

Прометей ёдимга тушади шунда,  
Кўкси қон, чўққи қон, занжирлари қон.  
Лек ўзи уфқа кўз тикиб кунда,  
Умрини санайди бедард, ёеармон!

Ҳа, ундан ёдгормиш бизга бу өлов,  
Фидолик рамзидир эртак бўлса ҳам.  
Қон ранги бор деса оловда бирор,  
Ишонғин — қон тўкиб ёришган олам!

Қонда ҳам оловнинг тафти мавжуддир,  
Ўтюрак кишига жоним тасаддик.  
Ўтюрак кишини майдондан қидир,  
Лафзига, аҳдига ҳамиша содиқ!

Оташ деб ўғлингга қўйибсан исм,  
Оловдек гуруллаб ёниб турсинми?

Зулматга тик тутиб оташин кўксин  
Курашда баҳтини синааб кўрсинми?

Бир исм кифоя қилмайди лекин,  
Исмга яраша журъат ҳам керак,  
Журъатга муносиб бўлолса юрак,  
Забт этмоқ лозимдир ақл-идрок мулкин!

Исмига яраша қалби ҳам бўлса,  
Оҳ, қани ҳамиша гуриллаб ёнса!  
Гуриллаб ёнса-ю, эл-юрт қувонса,  
Эл-юртининг хилвати нур билан тўлса!

1976, ноябрь.



## **СОҚОЛ ҲАҚИДА**

---

Сен соқол қўйибсан, чиройли соқол,  
У сенга бирмунча ярашибди ҳам.  
Ўзингча кашф этиб ўзга бир олам,  
Ўзингча юрибсан мағрур ва хушҳол.

Мен сенга термулиб қоламан ҳайрон,  
Наҳотки, ёшликтан безибди, дейман.  
Наҳотки бемаҳал совиб қайноқ қон,  
Қалбида кексалик сезибди, дейман.

Биламан, болалар болалигида  
Тез катта бўлмоқни қиласди ҳавас.  
Сен ахир йигит-ку, чўнг билагида  
Ёшликнинг виқори ёнган басма-бас.

Наҳотки ёшликтан шунча тез тўйдинг,  
Наҳотки таптига беролмадинг дош.  
Наҳотки ўтида бемаҳал куйдинг,  
Ҳижронга отдими бирор қаламқош!

Е сени ёшликнинг азимкор қўли  
Бир синиқ сополдай улоқтиридими?  
Е сени босдими гумроҳлик сели,  
Алдамчи хаёллар йўлдан урдими?

Кексалик хилватин ё тинчроқ билиб,  
Бошпана қидириб қолдингми, қочоқ,  
Бегона мавсумдан ўлжа қидириб,  
Бегона завқларга очдингми қучоқ?

Кишилар ёш ўтиб сипо тортганда  
Соқолни ўзига кўради раво.  
Нега сен ёшликни қилиб бот канда,  
Дардингга изладинг соқолдан даво!

Ё тентак ҳавасми, ё бебош қилиқ?  
Шундайми? У ҳолда соқолни қирдир.  
Ёшликка ёшликнинг ўз кўрки лойик,  
Ёшликда ёшликнинг гавҳарин қидир!

Ҳар ёшнинг ўз гашти, ўз жамоли бор.  
Бегона завқ-шавқни қилма ихтиёр!

1972



## **СИРЛИ ОЛАМ**

---

Мұхаббатнинг тили йўқ, соқов,  
Мұхаббатнинг қулоғи йўқ — кар.  
Чақирганга келмайди дарров  
Ва кетмайди ҳайдасанг агар.

Илтимосни қилмайди писанд,  
Молу дунё, мансаб бари пуч.  
Сен дардидан бўлдингми хурсанд  
Довонлардан қўрқма, юксал, уч!

Ҳеч ким унинг рангини билмас,  
Қайси йўлдан бориш ҳам мубҳам.  
Масофани назарга илмас,  
Бир қадамдир иккала олам!

Қайси бир сўз келадио мос,  
Қайси куйга беради садо?  
Ёки хосми ишва билан ноз,  
Ёки тоғдан кўчган акс-садо?

Гул баргига қурганми макон.  
Ёки қирлар сайргоҳими?  
Ё кафтингга кирганда тикон  
Чеккан ноланг севги оҳими?

Неча ёшга ярашади у,  
Неча ёшда тарки дил бўлур?  
Неча ёшда мисоли оҳу,  
Чўққилардан сакратиб қолур?

Кўз ёшига раҳми келурми,  
Е кулгини ёқтирадими?  
Е сафарда йўлдош бўлурми,  
Е маъқулми кўнгилнинг жими?

Ҳеч ким билмас, ҳатто мубтало  
Тавсифини қилиб беролмас.  
Баъзида баҳт, баъзида бало,  
Баъзида у жонга қиласр қасд.

Баъзида у юлдузлар аро  
Ўз кўшкига таклиф этади.  
Баъзида у девонанамо  
Саҳроларга бошлаб кетади.

Қўлларингга тутиб даста гул,  
Висол онин ваъда қилади.  
Баъзан ёри қошида кўнгил  
Ўзин етти ётдек билади.

У ҳеч кимдан сўрмас ижозат,  
Ўзи кириб борар кўнгилга.  
Кўтар, дейди, қаддингни азот,  
Нурли кўз-ла қара дер, элга!

Аммо қўлин боғлашга бермас,  
Бўйнин эгиб турмас бирор он.  
Таклиф қилсанг саройга кирмас,  
Унинг мулки шу ёруғ жаҳон.

Ким тақиқлаб қулф солса унга  
Ўзи бўлур охир шарманда!  
Нурдай сингиб кетади тунга,  
Ўз одатин қилмайди канда.

Унинг қадрин билмаслик гуноҳ,  
Севги қадрин билганга шараф!

Ҳавас қилсин, ким бўлса муштоқ,  
Ишқ ўтида ёнганга қараб!

Ениб-ёниб мусаффо бўлган  
Ҳар юракнинг ўзи бир олам.  
Бир оламки, нур билан тўлган —  
Жаннат руҳи мангу жамул-жам!

У нур қўйган кўнгил мулкига  
Асло қўнмас чанг, тўзон, ғубор.  
Ҳусн қўшиб олам кўркига  
Дейди:— Қани, мардлараро бор!

Ошиқ доим марди-майдондир,  
Мисоли шер ҳамла онида.  
Лочин каби кўзлари ўткир,  
Олов қайнар юрак қонида!

Муҳаббат у сирли бир олам,  
Ҳар юракда ўз китоби бор.  
Шу китобни ўқиган одам  
Деса ҳақли:— Менман баҳтиёр!

У мўъжиза! Таърифин минг йил  
Куйласанг ҳам бўлмайди адо.  
Ким мубтало бўлибди — қойил,  
Қилаверсин жонини фидо!

Севги кучи фидоликдадир,  
Ошиқ юрак ҳар ишга қодир!

1976, октябрь,  
Кораболта шахри.



## МЕРОС

---

### Ўғил-қиз фарзандларимга

Мен сени ўстирдим силаб-сийпалаб,  
Едиридим, ичиридим, тоза кийдирдим.  
Терласанг манглайдан теринг сидирдим,  
Қоқилсанг турғиздим кўнглингга қараб.

Тақдирдан шикоят қилмадим сенга,  
Сенга ҳам шу йўлни маслаҳат бердим.  
Адашсанг ҳақ йўлни кўрсатиб турдим,  
Покликдан нур қўйдим мурғак кўксингга.

Шукурки, камлигим йўқдир бошқадан,  
Бировга тикмадим ҳасад кўзини.  
Иккита қилмадим устоз сўзини,  
Дўстларим сафидан узмадим қадам.

Сочларим оқарди, йўлим қисқарди,  
Баъзи бир тишларим ўзимникимас.  
Дўстлар ҳам камайди, энди бут эмас,  
Киприкда, қошимда йўлларнинг гарди.

Гоҳ дилим ўйнайди, гоҳ босим баланд.  
Гоҳ бошим айланиб, тўхтаб қоламан.  
Энтикиб-энтикиб нафас оламан,  
Даҳшатли ўйларга фикрим бўлиб банд.

Шунда ҳам ўлимдан қўрқмайман, ўғлим,  
Ўлимдан қўрқмоқлик номардининг иши.  
Рост айтсам, ниятим чала қолиши  
Бағримни қиласи тилим ва тилим!

Қулоқ сол, эй ўғлим, вақтики етиб  
Мен ёруғ дунёдан кўзимни юмсан,  
Демакки ижоддан тўхтасам, тинсан  
Уйма-уй изғима зўр мерос кутиб.

На бордир мол-мулким, на мўмай пулим,  
Дўстларим ясайди умримга якун.  
Сен учун меросим пок умрим, лекин  
Ундан ҳам азизи ўз она тилим!!

1972, январь.



## ҚИРГОҚЛАР

---

Икки юрак — икки ён қирғоқ,  
Қоқ ўртада севги дарёси,  
Тўлқинидан икки қалб уйғоқ,  
Икки қалбда нозу ҳаёси!

Бир-биридан кўзин узмас ҳеч,  
Бир-бирига йўллайди салом.  
Мавжлар сочса бирига севинч,  
У бирида ҳасратдан илҳом.

Бирин бахти бирига мадад,  
Бирин дарди бирин ўртайди.  
Иккисида армонлар беҳад,  
Бар тутқизмас хаёли дайди!

Бир-бирига гоҳ келиб яқин,  
Гоҳо яна кетади йироқ.  
Яқин келса хушнуду дуркун,  
Узоқ кетса ўқинчу фироқ.

Бир-бири-ла топишмай ҳамон,  
Бир-бирига зор-зор оқади.  
Қоқ ўртада тўлиб беармон  
Севги отли дарё оқади.

1976, ноябрь.

## СЕНИ СЕВДИМ...

---

Сени севдим жону дил билан,  
Сени севдим, бўлмадинг иқрор.  
Сени севдим ширин тил билан  
Қиё боқиб ўтмадинг бир бор!  
Йиллар ўтди, ўтди ёшлиқ ҳам,  
Тинди қалбда жўшқин урган қон.  
Қалбим титрар ҳамон эсласам,  
Ҳамон бордир кўнглимда армон!  
Сендан олдин умрим тугаса,  
Сен борсанки, демак тирикман.  
Ҳеч ишонма у ўлди деса,  
Ҳаётингга доим шерикман.  
Йўлларингда чечак учраса,  
Яшиаб турса, бил, ўша менман.  
Боғларингда чаман барқ урса,  
Нур уфурса, бил, ўша менман.  
Эрта баҳор келиб қалдирғоч  
Салом деса, бил, ўша менман.  
Баҳор келиб бошингга гултоҷ,  
Еллар эсса, бил, ўша менман.  
Чанқовингни қондирса булоқ  
Бағрин очиб, бил, ўша менман.  
Тунлар йўлинг ёритса чироқ  
Шуъла сочиб, бил, ўша менман.  
Кетолмайман ҳеч сендан йироқ,  
Инонма сен менинг қабримга!  
Аслида мен севган кунимоқ  
Кўмилганман сенинг қалбингга!

1959, Ереван.

## ИЛҲОМ

---

(Оқ шеър)

Тун яримда кўчамдан ўтсанг,  
Ёниб турса битта дераза,  
Демакки, мен уйроқман ҳали,  
Ҳали меҳмон илҳом париси.  
Сен bemалол эшигимни қоқ,  
Тортинмасдан киравер, дўстим.  
«Янги шеърин илк китобхони  
Мен бўлдим!» деб керилма лекин.  
Тонгда туриб ўқиганимда  
Балки уни йиртиб ташларман.  
Кейин мендан юрма сўроқлаб,  
Бу саволнинг бўлмас жавоби!  
Баъзан илҳом чиндан келади,  
Чиндан сени хурсанд этади.  
Баъзан эса, ёлғончи каби  
Сохта бир гул ташлаб кетади!

1977, 1 февраль  
Ашхабод



## ЮЛДУЗЛАР

---

Мен бундоқ қарасам кўкда юлдузлар  
Бир-бирга ўхшаш ёнар, ялтиллар.  
Гўёки ҳаммаси бир тилда сўзлар,  
Гўёки совуқ тун бирдек қалтирас.

Ва лекин барчаси бир хилда эмас,  
Биттаси яқиндир, биттаси йироқ.  
Барчаси бир хилда шуъла ҳам сочмас,  
Биттаси кичикдир, бири каттароқ.

Юлдузга ўхшайди ерда одам ҳам,  
Турлича ранг-рўйи, феъли атвори.  
Биттасин бағрига жойлашса олам,  
Биттасин кўнгли тор, қил сиғмас бағри!

Биттаси умрбод порлаб ўтади,  
Биттаси кўзингга ташланар аранг.  
Биттасин ёшлиқдан ёниқ омади,  
Биттаси бахтини доим босган чанг!

Эҳтимол шу сабаб осмонга боқиб,  
Юлдузин ахтарар ерда кишилар.  
Энг порлоқ юлдузни ўзига тақиб,  
Шу порлоқ юлдузни доим олқишилар!

Эҳтимол шундандир юлдуз учганда  
«Оҳ, кимнинг юлдузи сўнди» демоги.  
...Осмонни ҳеч юлдуз қилмасин канда,  
Ҳеч кимнинг ерда ҳам сўлмасин боги!

1977, февраль.

## БУЛОҚ

---

Умримни гар десанг қайнар бир булоқ,  
Тубида тип-тиниқ сувлари бордир  
Шу тиниқ сувлари ёшлигим, ўртоқ,  
Тош отиб лойқатма, шундайча қолдир.

Шундайча қолдир-у, чанқоқлигинг бос,  
Лек булоқ сувидан тўлқинлар кутма.  
Тўлқинлар денгизда бўлади, холос,  
Аммо у шўр, дўстим, лабингга тутма!

Тўлқинлар истасанг, денгизларга боқ,  
Сокинлик, ўйчанлик рамзидир булоқ!

1976, март.



## У МЕНИ СЕВМАДИ...

---

У мени севмади,  
Мен севдим жондан,  
Ёшлигим барқ урган илк баҳор кундан.  
Ва лекин, эй Тақдир,  
Илтимос сендан  
Шафқату меҳрингни аяма ундан!

Майли, у севмасин мени умрбод,  
Ва лекин умрбод баҳтли бўлсин у.  
Ҳамманинг бошини силамас ҳаёт,  
Шу қизга онадек бўлиб қолсин у.

Юзига туширма бемаҳал ажин,  
Сочини асрагин оқ толалардан.  
Яхшилик синасин бардош ва кучин,  
Холи қил қалбини оҳ-нолалардан.

Тилига калом бер эзгу ва ширин,  
Ақлини расо қил,  
Фикрини ёниқ.  
Ниятин холис тут,  
Сирин яширин,  
Уфқини равшан қил,  
Йўлини аниқ.

Бахт уйин тўлдирма қора тутунга,  
Кўзида ёшини кўрмасин кўзим!  
Дард бўлса менга бер,

Роҳатин унга.

Ҳар қашча ғам бўлса чекай мен ўзим!

Ҳеч кимса дилига бермасин озор,  
Ҳеч кимса йўлига ташламасин тош.  
Ноҳақлик дардидан йиғламасин зор,  
Зўравон қаҳрига беролсин бардош.

Кўзини очиқ тут,

Рақиби ногоҳ

Хилватда оёғин чалиб кетмасин.

Эзгулик уфқига тикканда нигоҳ

Ширин сўз номардлар йўлин кутмасин!

Яна бир илтимос:

Унинг ишқини

Ҳеч кимса қалбимдан юлқиб олмасин.

То тирик эканман севги тошқини

Ўзга бир қирғоққа ҳавас қилмасин!

Мен ундан олдинроқ оламдан ўтсам,  
Умримнинг қолганин унга қўшиб бер.  
У узоқ яшасин гар севмаса ҳам,  
Ишқимнинг ҳурмати қалбим шуни дер.

Агар у бирорни севгудай бўлса,

У йигит менингдек севолса шояд.

Севса-ю, ишқида умрбод қолса,

Мен ундан миннатдор бўлардим ғоят!

У фарзанд кўрганда,

Фарзанд ғамидан

Ёқасин йиртмасин сочини юлиб.

Тўқсон йил яшасин жуда камида,

Ҳамиша хушчақчақ, бардам ва кулиб!

1977, январь.

## ОНА ТИЛИМ — ШИРИН СЎЗИМ

---

Ҳар сўзда минг йилнинг тарих юки бор.  
Ҳар бири бир олам синовдан ўтган.  
Баъзида йиғлаган ўқсиб-ўқсиб зор,  
Баъзида ботирлар этагин тутган.

Баъзида нур бўлиб йўлни ёритган,  
Гоҳида бўйнига ташланган сиртмоқ.  
Гоҳида меҳридан тошни эритган,  
Гоҳида ҳайқирган:— Кўзларингга боқ!

Бировлар ўқ отган, бировлар бўғсан,  
Бировлар зинданда тутган тушовлаб.  
Бировлар кек билан кетидан боқсан,  
Бировлар камситган таъна гап ташлаб!

Қийналган, инграган, аммо ўлмаган,  
Қоп-қора қонига белангандан беайб.  
Хуш-хандон бўлса ҳам йиллаб кулмаган,  
Ва лекин қалбини қилмаган майиб!

Қўксисида сақлаган бутун кучини,  
Фазилат, кўркига қўндирамаган гард.  
Рақибдан олгану баъзан ўчини,  
Лек золим қўлида бўлмаган номард!

Асрлар ўтса ҳам мағрур қад билан  
Истиқбол уфқидан узмаган кўзин.  
Қадрини байроқдек кўтариб баланд  
Жанг-жадал, курашга шай тутган ўзини!

Охири курашда чиқди-ю ғолиб,  
Жаҳонга кўрсатди ўзин баралла.  
Оҳ, сўзим, тилгинам, бағримга олиб,  
Гўдакдек эркалаб айтайми алла!

Ё мадҳинг ёзайми ифтихор билан,  
Кўксимда барқ урган навбаҳор билан!  
Оҳ, азиз тилгинам, иқболинг баланд,  
Ҳар сўзинг бир қуёш, қани кел, нурлан!

Кел! Нурлан, нурлансанг арзийди энди,  
Бошингни кўтариб олам узра боқ.  
Боболар бўй-бастинг кўрсайди энди,  
Дунёга сиғмасдан қувнарди қандоқ!

Шунчалар очилиб кетибди ҳуснинг,  
Шунчалар бойсанки, сержилва, рангдор.  
Ойнага қарасанг яшариб ўзинг,  
Бахтингдан миннатдор бўласан минг бор!

Оҳ, она тилгинам, ширин сўзгинам,  
Бахтингга тасаддиқ бўлай ўзгинам!  
Тилини севмаган номард бўлади,  
Номарддан элу юрт, тарих кулади!

Мен сенга фидоман умрим борича,  
Меҳрингда адоман умрим борича!

1976, декабрь.



## ИШҚ

---

Баҳорда гул яшнаб, қишида қор ёғиб,  
Саратон яллиги сочаркан олов,  
Севгини ҳеч кимса сигирдай соғиб,  
Тойчадек бўйнига солғанмас жилов.

У жумбоқ — Афлотун ақли етмаган.  
У шеър — Навоий куйлаб битмаган.  
У юлдуз — Улуғбек кашф этолмаган.  
У кўприк — Искандар забт этолмаган.  
У чўққи — альпинист оёқ қўймаган.  
У қўшиқ — ҳеч инсон ҳали тўймаган.  
У йўлдир — сўнгини кўз илғамаган.  
У денгиз — тубини ел тўлғамаган.  
У чаман — шайдоси яйраб юрмаган.  
У найза — учида томчи турмаган.  
У ҳайкал — шаклини ҳеч ким чизмаган.  
У нурдир — тезликда ҳеч ким ўзмаган.  
Минг бир ранг, минг бир тус, минг бир  
хилладир,  
Беқиёс тасвири сонсиз тилдадир.  
Номи йўқ кашфиёт, ранги йўқ бўёқ,  
Қайғуси қувончdir, шодлиги фироқ.  
Ҳар қалбга тўғрилаб қўйилган ўқдир,  
Гар тегса шу зотнинг армони йўқдир!

1974, октябрь.

## АЖИН

---

Юз-кўзимга тушган ажинлар  
Йилларимнинг қат-қат варафи.  
Варақлаб кўр — бир-бир очилар  
Жавоби йўқ умрим сўроғи.

Яхшилаб боқ: ҳар бир сатрида  
Оlam-олам сирли белги бор.  
Шундай сирки, унинг қаърида  
Қанча қайғу, қанча кулги бор.

Ҳатто унда — ўзим унуган  
Қанча-қанча нурли излар бор.  
Тилсиз бўлиб мангуга қотган,  
Тилга келмас оташ сўзлар бор.

Ҳатто ўзим тилга ололмай  
Қалбда ёнган олов ҳам унда.  
Кўз ёш томиб ичилмаган май,  
Аччиқ ҳижрон бари жам унда!

Гоҳ ёзилмай, гоҳ чала қолган  
Сатрларнинг армони унда.  
Беиз келиб, беиз йўқолган,  
Ҳис-туйғунинг макони унда.

Унда мавжуд қадрин топмаган  
Заҳматларнинг соқов фарёди.  
Жангга кириб баҳти чопмаган  
Марди-майдон йигитлар ёди!

Бевақт кетган фарзанд алами,  
Ё онанинг тўймаган меҳри,  
Ё тўсатдан кулган баҳт дами  
Босиб кетган ўчмас ўз муҳрин!

Дунё шундай: умр йўлида  
Ҳар лаҳзанинг изи қолади.  
Баъзан изни киши дилида,  
Гоҳ юзида олиб қолади!

1976, февраль.



## ДАРЁГА ХИТОБ

---

Сен дарё бўлсангу, жарликда оқсанг,  
Боғ-роғга бепарво, қуийдан боқсанг.

Нафингни кўрмаса ўт-ўлан, ниҳол,  
Мен сени олқишлиб, севишим маҳол.

Бунчалар зиқнаю баҳилсан ахир,  
Атрофга назар сол: қуп-қуруқ тақир.

Бир томчи сувингни қилмай бегона  
Керилиб оқасан денгизга ҳамон

Ва яна дейсанки, бу тупроқ она,  
Бу сўзинг чинлиги, рост айтсам, гумон!

Оғзингни бекорга кўпиртирма, қўй,  
Қудрату ҳимматдан лоф ҳам урма, қўй.

Ким сениңг номингни олади тилга,  
Ким сени улуғлаб ёяди элга?

Ким сенга қўшиғу алла айтибди?  
Барча дер:— Бекорга оқиб ётибди!

Фақат бир дарёсан назардан йироқ.  
Юрагинг тошдандир, ўзинг бақироқ.

Ё мағрур тентаксан, ё назари паст,  
Эл-юртнинг баҳтини қилмайсан ҳавас!

Мард бўлсанг қани чиқ жардан юқори,  
Бағрингни куйдирсин саҳролар зори.

Тармоқлаб-тармоқлаб дала-қирга оқ,  
Үтганинг йўлларга сўнгра ўзинг боқ!

Яшиллик кўзингни тўлдирса нурга,  
Мен шунда бўламан сен билан бирга.

Олқишлиб-олқишлиб мадҳинг қилурман,  
Мен сени танти, мард, сахий билурман.

Сахий бўл, сахийлар машҳури олам!  
Меҳрингга муҳтождир боғу роғ, далам.

1976, ноябрь.



## АГАР...

---

Қувончингдан йиғласанг, эркам,  
Кўз ёшингда қуёш кўраман.  
Агар сени ўкситса алам,  
Ҳар томчида бир тош кўраман.

Шодлик билан ташласанг нигоҳ,  
Қерак эмас тунда ҳам чироқ.  
Бағринг ёниб, агар тортсанг оҳ,  
Шунда тушар соchlаримга оқ!

1977, февраль.



## **ҚҰМСАШ**

---

Сўқмоқ билан келардим сенга,  
Таниш эди сенга у йўллар.  
Бошин қўйиб баъзан кўксингга,  
Бир-бирини тингларди диллар.

Кетар эдим яна шу йўлдаи,  
Қайтар эдинг сен ҳам изингга..  
Билдим бир кун — севмасдинг дилдан,  
Буни уқдим қараб кўзингга!

Иигит эдим ғуури баланд,  
Оёғимни тийдим шу кундан.  
У сўқмоқни ўтлар қилди банд,  
Ут чайқалар ел тўлқинидан.

У сўқмоқдан қолмади нишон,  
Сендан ҳам йўқ бирон бир дарак.  
Шу атрофдан ўтганим замон,  
Алланечук уради юрак!

**1977, февраль.**

## **СЕВГИНИНГ ЁШИ НЕЧАДА?**

---

Тоқтош-ку, севгини кўп эски нарса,  
Ҳар юрак янгилаб туради, деган.  
Хўш, унда бирор ёш гап сўраб қолса,  
Қайси юрт ва элда туғилган экан?

Қайси гул назарин тортибди аввал,  
Не учун баҳорга ишқибоз бунча?  
Не учун нуридан олам мунаввар,  
Не учун кўзига чиройли фунча?

Не учун севганда кўзга келар ёш,  
Хилватда бир ўзи нега урар оҳ?  
Қалбига тушгандек сўнмас бир оташ,  
Дўстига дер доим:— Мендан бўл огоҳ!

— Бунчалар кўп экан саволинг сенинг!  
— Бўлмаса севгининг ёши нечада?  
— Ўшанча, нечани истаса кўксинг,  
Лекин у туғилган ойдин кечада!

У ўзи бир дунё дунё ичида,  
Мард олиб юради қилич учида!

1977, февраль.

## ШЕЪР БИЛАН ЁШЛИК ЭГИЗАК

---

Шеър билан ёшлик эгизак,  
Иккисининг юраги битта.  
Битта қалбдан ҳамнафас десак,  
Хато бўлмас, дўстим, албатта!

Ёшлик ўтиб, қалб ўти сўнса,  
Шеърдан ҳам кетар ҳарорат.  
Ёки шеър дуд сочиб ёнса,  
Билинг, шоир қарибди, албат!

Ялт-юлт ёниб қолса ҳам гоҳ-гоҳ,  
Шуъла сочиб, гуриллаб турмас.  
Гўё ўтга ташланган нам шох,  
Нам шох эса ўт нафас урмас!

Ёшлик ўзи яхши бир назм,  
Яхши назм ёшликка монанд!  
Иккисини қўш кўрса кўзим,  
Иккисининг тилларига қанд!

1977, январь.



## ҚАЛБИМНИ ҚАЙТАР ЎЗИМГА

---

Сен кетдинг кузда, қолдим кузатиб,  
Елғиз бир ўзим.  
«Омон қайт!»— дедим қўлим узатиб,  
Кўзингда кўзим.  
Ўзим қолдиму юрагим сенинг  
Измингда кетди.  
Орзу-умидим, тилагим сенинг  
Кўзингда кетди.  
Қайтар чоғингни кутдим интизор,  
Кўзим тўрт бўлиб.  
Шаҳардан қайтдинг айни навбаҳор,  
Қалбинг ёт бўлиб.  
Ўзинг ўша-ю, кўзинг ўша-ю,  
Юрагинг бошқа.  
Бағрингга аста қўлим солсам, у  
Ўхшайди тошга!..  
Лекин сен менинг қалбимни қайтар,  
Қайтар ўзимга!  
Кейин кўринма, эй севги сотар,  
Асло кўзимга!!



## ЁШИНГНИ САНАМА!

---

Ёшингни санама, яшайвер яйрағ,  
Умрнинг ёш билан қанча иши бор!  
Ажал ҳам келмайди ёшингга қараб,  
Ажалнинг йўлини тўсмоқлик душвор.

Қелажак боқади ёш эмас, ишга,  
Иш билан умрини чўзади киши.  
Ҳар кунинг сазовор бўлса олқишига,  
Баҳордан гўзалдир умрнинг қиши!

Ўттиз йил яшаган гўнг қарға эмас,  
Ўн йилча яшаган бургут иззатда.  
Қалбингда ҳалоллик, қудрат бўлса бас,  
Ўзингни масъул тут эл хизматида!

Ёшингни санама, яшайвер яйраб,  
Ёш билан ўлчанмас умр муддати.  
Яхшилар тобути кетидан қараб:  
«Эҳ, аттанг!» демоқлик элнинг одати.

Минстр ё олим бўлиш шарт эмас,  
Одамсан, одамдек яшаб ўтсанг бас!

1976, ноябрь.

## ҚҰЗЛАР ҲАҚИДА

---

Менинг күзим тімқора әмиш,  
Киприкларим қалин ва таранг.  
Сенинг күзинг мовий ёнармиш,  
Киприкларинг сариқ, тилла ранг.  
Менинг күзим Ҳофиз ғазали,  
Навоийда топмиш тасвирин.  
Қора күзли шарқнинг гүзали,  
Яхши билар муҳаббат сирин.  
Сеники ҳам мубтало бўлса,  
Ҳазилакам куйиб ёнмайди.  
Ишқдан бошга гар қилич келса,  
Содиқ қолиб, асло тонмайди.  
Муҳаббатда күзнинг фарқи йўқ,  
Ҳамма кўзда осмон мовий ранг.  
Қуёш кўкда ёниб турган чўғ,  
Аlam ўтса асаблар таранг.  
Кўм-кўк — баҳор чоғида майса,  
Қузда эса сап-сариқ хазон.  
Қор оқидан ҳамма кўз толса,  
Ҳамма кўзда қип-қизилдир қон!  
Ҳаммаси ҳам бағри ўртанса,  
Аччиқ-аччиқ кўз ёш тўкади.  
Бахти кулиб, шодликдан ёнса,  
Ҳар юракка умид экади.  
Демак кўзлар бир хил кўради,  
Фақат ранги ҳар хил, ранг-баранг.  
Демак кўзлар рангига эмас,  
Кўзлар туби — юракка қаранг!

1976, декабрь.

## ЛОЧИН

---

Лочинда одат бор: сўнгги онида  
Чўққидан қуийга ўзин отади.  
Мажолсиз ҳолини нодўст ёнида  
Намойиш бўлишдан дариф тутади.

Мурдаси қайларда қолиб кетса ҳам,  
Дўстларим кўзида кўрмай дейди ёш.  
Ёш, дейди, юракдан силқиган алам,  
Кўз ёшдан қурийди мадору бардош!

Лочинлар чўққини этади канда,  
Судралиб юришдан ҳазар қилганда!

1976, октябрь

\* \* \*

Баҳорда кел, дединг,  
Борсам йўқ эдинг.  
Ёз ойи кел, дединг,  
Борсам йўқ эдинг.  
Куз келди. Кузда ҳам  
Борсам йўқ эдинг.  
Қиши ўтди. Қишида ҳам  
Ҳали кут, дединг.

Севгилим, сен кутган бешинчи фасл,  
Билмадим, келади қайси бири йил!  
Наҳотки келади!

1977, март,  
Москва

## БАҲОР КЕЗИДА

---

Эсимда: бир маҳал баҳор кезида  
Юзимдан чўлп этиб ўпди-да бир қиз,  
Чопқиллаб қочганча йўқолди беиз...  
Ҳаққим йўқ турмади десам сўзида:  
На бир сўз айтганди, на бир ишора...  
Шу бўса ҳали ҳам юзимда чақмоқ,  
Эҳтимол сочимга оралаган оқ  
Шу кундан бошланган бўлса на чора!

1977, январь.

## АТТАНГ...

Фарёд уриб, нолиди йигит,  
Писанд қилмай ўтди қиз аста.  
Йигит қолди қалби сочиб ўт,  
Қўлларида чаман гулдаста.

Ииллар ўтди. Йигит шарт юлиб —  
Отди севги гулин кўксидан.  
Энди эса, қиз келар кулиб,  
Асал томиб ҳар бир сўзидан!

Йигит эса парвойи фалак,  
Муздек совуқ ишқ сўнган юрак!

1977, январь.

## СЕН-ЧИ?

---

Иккимиз синфдош студент эдик,  
Дарсдан сўнг ёнма-ён кетардик бирга.  
Баъзида кулардик қувноқ ва тетик,  
Баъзида уялиб қаرارдинг ерга.

Кузатиб мен сени сой бўйигача  
Орқамга қайтардим ўзимда йўқ шод.  
Кузатсам дер эдим, оҳ, уйигача...  
Чеки йўқ гўзалди бу йўл, бу ҳаёт.

Қандайин ўтганин билмасдим кеча,  
Минг ўйлар келарди масъум кўнгилга.  
Эрталаб синфда сени кўргунча,  
Кўзларим жовдираб боқарди йўлга.

Бир куни дедингки: «Кузатма, қўй, бас!»  
Сен кетдинг бир ўзинг.

Мен қолдим ҳайрон.  
Сабаби ҳали ҳам менга маълуммас,  
Ҳали ҳам ёдимда ўша машъум он!

Кун ўтди, ой ўтди...  
Утди неча йил...  
Сочимга оралаб қолибди туман.  
Баъзида ёшлиқни қўмсаб қолиб дил.  
Ху, ўша кўчадан ўтаман.  
Сен-чи?

## ДҮСТИМГА БЕРГАН САВОЛИМ

---

Яхши кунлар бир пиёладан  
Ёшлик учун ол шароб ичдик.  
Лола излаб боғу даладан  
Бирга-бирга қири сой кечдик.

Бир гул топсак, ардоқлаб тутиб,  
Навбат билан бир-бир ҳидладик.  
Тор кўприкдан қўл ушлаб ўтиб,  
Ариқлардан бирга ҳатладик.

Бир кўчадан бориб ёнма-ён  
Бир кинони бирга кўргандик.  
Бир хил эди орзу ва армон,  
Севги сирин бирга ўргандик.

Бир кўйлакни баъзан галма-гал  
Кийиб чиқдик қиз ваъдасига.  
Неки ўтса ҳаммасин тугал  
Ўртоқлашдик кун эртасига!

Бари яхши! Ёқар хушимга!  
Айт-чи, дўстим, боқмасдан ерга:  
Гар қора кун тушса бошимга,  
Бўласанми шунда ҳам бирга!

1962.

## МЕНДАН ЯШИРМА

---

Сен бугун келмадинг ваъда ерига,  
Сен келар томонга боқиб толиқдим.  
Шу куни тушунмай қалбинг сирига  
Баъзида ўқиндим, баъзан ҳовлиқдим.

Бағрида эзғилаб шубҳа гирдоби  
Не ҳолга солганин билсайдинг шунда!  
Ялт этиб чиқарми меҳрим офтоби  
Деб, ҳулкар оғгунча кўз тутдим тунда!

Йўқ, сендан бўлмади, азизим, дарак,  
Бошимни мен қуи солганча кетдим.  
Қафасга тушгандек типирлаб юрак,  
Танишу билишдан ёшим беркитдим.

Ким тўсди йўлингни! Қора кўзлими!  
Е мовий кўзлининг кўл сокинлиги!  
Е фаттон кўзлими, ширин сўзлими!  
Е бўта кўзлининг суқ дуркунлиги!

Лекин айт, азизим, мендан яширма,  
Бир қалбда яшамас икки ёр ишқи!  
Бирини беҳуда қийнама, сирма,  
Барибир яшириб бўлсайкан кошки!

Алданиб севгили бўлгандан кўра,  
Айрилиб, қон йиглаб ўтган яхшироқ!

1962.

## СЕВГИМДА ЁН ДЕЙСАН

---

Севгингни сен мендан азиз тутасан,  
Севгимда ён дейсан умринг борича.  
Хўп, ёнай! Яна сен нима кутасан?  
Айт, борми ўзингда шафқатдан пича?

Майли, мен ёнайин севгинг ўтида,  
Кўкларга соврилиб кетсин кулларим!  
Сен ўтган кўчанинг йироқ четида  
Чанг босиб, қовжираб сўлсин гулларим.

Шундан сўнг, айт эркам, сенга ёғишилаб  
Ким шеърлар ёзади мен каби ёниб!  
Ким сени ҳар куни тонгдан олқишилаб,  
Йўлингни кутади гул билан толиб?

1962.



## ОҚ ШЕЪР

---

Севсанг мени ёшлигимда ҳам,  
Оппоқ сочли чофимда ҳам сев.  
Севсанг мени бойлигимда ҳам,  
Қашшоқ юрган чофимда ҳам сев.  
Севсанг мени кийим ярашган,  
Ярашмаган чоғида ҳам сев.  
Гар баҳтимдан умидвор бўлсанг,  
Баҳтсиз юрган чофимда ҳам сев.  
Сенинг севгинг ракета бўлиб  
Юксакларга учирса шояд.  
Учиришга қодир бўлмаса,  
Нега керак бундай муҳаббат!?

1962.



## ЙИҒЛАМА ҲЕЧ ҲАМ

---

Бир кўча қиз кулади хандон,  
Гар ўзингни кўрмасам ҳам, жон,  
Сенинг кулгинг таниб оламан!

Лекин йиғлаб қолгудай бўлсанг,  
Фарёд уриб, ҳасратга тўлсанг,  
Ажратолмай дардда қоламан.

Чунки сенинг йиғлаган чоғинг,  
Нима қилай, кўрмаган бўлсам!  
Яхшиси, сен йиғлама ҳеч ҳам.

1977, февраль



## ДАРДИНГ БҮЛСА, АЙТ...

---

Истаган чоғ  
Эшигимни қоқ.  
Тортинмасдан киравер, ўртоқ.  
Дардинг бўлса, айт,  
Қалбингни бўшат!  
Ургада нон,  
Истасанг ушат!  
Керак бўлса берай маслаҳат,  
Қарз керакми, ма, ол, бемуҳлат.  
Соз керакми, мана танбур, чал,  
Орзуладек кўкларга юксал.  
Ўтган бўлса алам жонингдан  
Майли, сўйла, жилмай ёнингдан.  
Кўз ёш тўқсанг артаман ўзим,  
Йўлларингда доимо кўзим!  
Лекин келма менинг қошимга  
Ғаламису ғийбат сўз топиб.  
Бундай сўзлар келмас ҳушимга,  
Ва кетаман эшигим ёпиб!!

1977, февраль



## БОИСИ ЎЗИНГ

---

Мен оламни нурга тўлдириб,  
Хандон урсам — боиси ўзинг.  
Қучоғимга гуллар тўлдириб,  
Йўлда турсам — боиси ўзинг.  
Саҳар туриб гар нолиш қилсан,  
Кўз ёш тўксам — боиси ўзинг.  
Текис йўлда ногоҳ қоқилсан.  
Тойиб кетсан — боиси ўзинг.  
Қўшиқ бўлса ҳар сўз тилимда,  
Янграб турса — боиси ўзинг.  
Обрў топсан севган элимда,  
Бахтим кулса — боиси ўзинг.  
Сенсан бахтим, сенсан кўз ёшим,  
Сен булатим, сенсан қуёшим.  
Йиғлаганда кўз ёшим ўзинг,  
Яйраганда қуёшим ўзинг!

1977, январь



## **МАЙЛИ, БАХТИЁР БҮЛ!**

---

Сувга боқдим, олиб кетди ўйларимни,  
Шамол келиб юлқиб кетди куйларимни.  
Рўпарамдан бир қиз ўтди — қирқ кокилли,  
Деган каби «кўриб қўйгин бўйларимни!»

Қадди расо, ўзин эса ғунча дейсан,  
Истараси иссиқлиги кунча дейсан.  
Кўзларининг порлашини кундуз десанг,  
Қошларини қоралигини кеча дейсан.

Меҳр қўйиб, шу жононни севсаммикан?  
Деса агар: «Тенгиммассан, бўлма тикан»,  
Ўтиб кетган қирчиллама ёшлигимнинг  
Орқасидан йўрға миниб қувсаммикан?

Йўрға миниб қувардиму етолмайман,  
Йўллар олис, тоғлар баланд — ўтолмайман.  
Майли, соғ бўл, бахтиёр бўл, эй жонона.  
Зўрлаб севгинг этагидан тутолмайман!

1959.



## **САВОЛЛАР**

---

Гул бўлса-ю, яшнаб турмаса,  
Муҳаббатдан савол сўрмаса,  
Кимга керак у турфа гуллар?

Бахт уфқига бўлмаса туташ,  
Тепасида ёнмаса оташ,  
Кимга керак у чалкаш йўллар?

Соф сувини элга тутмаса,  
Юрт боғини чаман этмаса,  
Яшнатмаса нимаси булоқ?

Еру дўстга тутмаса ўзин,  
Тингламасаadolat сўзин,  
Кимга керак бундақа қулоқ?

Гўзалликка мафтун бўлмаган,  
Севинчидан мамнун кулмаган —  
Кўзлар, айтинг, нимага керак?

Уз бахтига тўйиб қонмаса,  
Вақти келса куйиб-ёнмаса,  
Кимга керак ундайин юрак!!

**1977, январь**

## **ЁНИНГДА БОРАРДИМ...**

---

Ёнингда борардим ёнма-ён аста,  
Оламга боқардим кўзим ҳавасда.  
Бир маҳал югуриб кетдим олдинга,  
Сен қолдинг орқамда термилиб пастда.

«Эҳ, ташлаб кетди» деб ўйлама тағин,  
Олдинда хавф солган бир шарпа сездим.  
Faflatda қолмасин, дея ўртоғим,  
Мен сендан олдинроқ югуриб ўздим!

1977, январь

## **СЕВГИ НИМА?**

— Севги нима, айт, севги нима?  
— Кор остида ётган чучмома!  
То фурсати етгунга қадар  
Уз васлини пинхона тутар.  
Чақирсанг ҳам келмайди ўзи,  
«Йўқ, бормайман!»— шу қатъий сўзи!  
Баҳор келиб, эсганда шамол,  
Уз-ўзидан кўрсатар жамол!

1977, январь

## СЕВГИ ҚАЛИТИ

---

Севгимнинг калити қўлингда бўлса,  
Бармоққа кийдириб ўйнама уни.  
Мабодо бемаҳал йўқолиб қолса,  
Бошқаси бордир, деб ўйлама уни!

Севгининг калити битта бўлади,  
Қалити йўқолса севги ўлади.  
Кейинча топилса фойда йўқ ундан,  
Отилган ўқ яна жой олмас қиндан!

1977, март.



## **ОНАНГНИ УЧРАТДИМ...**

---

Бир ҳафта бўлдики, сен мендан йироқ...  
Кун кеча онангни учратиб қолдим.  
Кўнглимда ёқилиб ногиҳон чироқ,  
Кўзларим ёришиб, енгил тин олдим.

Биламан, онангнинг ҳеч хабари йўқ,  
Иккимиз мубтало ишқу фироқдан.  
Барibir шунда ҳам умид деган чўғ  
Ялт этиб дилимда, боқдим йироқдан.

Кўнглидан кечдики, қани шу кампир  
Бўлсайди умрбод менга қайнана.  
Қошидан салом-ла ўтдим-да бир-бир  
Сал юргач, қайрилиб қарадим яна.

Онанг-чи, бехабар, парвойи фалак  
Танларди бозорда юмшоқ ҳандалак!

**1977, март,**



## О, СЕВГИ...

---

Севмаган юракда шафқат бўлмайди,  
Кўрмаган кўзларнинг меҳригиёси.  
Севмаган юракнинг нияти майда,  
Орзуси бачкана, ва тор дунёси!

О, севги, нақадар олижанобсан,  
Табиат кўркининг буюк инъоми!  
Сен ўткир шоирдек ҳозиржавобсан,  
Қалбингда ҳамиша ҳаёт илҳоми.

Сен ҳоким юракка, сажда қиласман,  
Мен сени қудратли худо биламан!

1977, март



## ЛЕКИН, СЕН СЕВМА!

---

Сени севдим, лекин сен севма,  
Ишқ ўтида ёнай бир ўзим.  
Севги отли бу улкан кема  
Олиб кетсин мени беизин!

Сени севдим, лекин сен севма,  
Йўлда танҳо турай бир ўзим,  
Чақирсан ҳам, майли, сен келма,  
Узоқларда, деяй, ёлғизим!

Сени севдим, лекин сен севма,  
Кўз ёшингни кўрмасин кўзим.  
Лек кўз ёшим кўрганда кулма,  
Кулсанг менда битади тўзим!

Сени севдим, лекин сен севма,  
Севмаганинг менга яхшироқ.  
«Мен ҳам сени оҳ... севдим!» дема,  
Десанг, демак, менга ўша чоқ,  
Шубҳа тушиб, дардим ошади!  
Севмаганинг менга яхшироқ!

1977, февраль

## **О, ТАБИАТ...**

---

Мен қушларни севаман жондан,  
Қаноти бор уларнинг учқур.  
Мен қүёшни севаман чандон,  
Нур сочади, олам узра нур.

Мен чўққига фидойи жонман,  
Уларда бор ғурур, салобат.  
Юлдузларга боқиб ҳайронман,  
Қанча, жилва қанча малоҳат!

Денгизларнинг тўлқинига жон,  
Шижоату тийранлик рамзи.  
Қандай яхши кўм-кўк кенг сайҳон,  
Ўтлаб юрса маърашиб қўзи.

Дарёларнинг жўшиб, ҳайқириб,  
Оқишида қанча журъат бор.  
Қайнар булоқ, оҳ, тилга кириб,  
Куйлаб оқса қанча санъат бор.

О, табиат, мўъжиза олам,  
Мафтунингман ҳамиша ўзим.  
Сени бунча қилган кенг, кўркам,  
Менинг қалбим, идроким, кўзим.

**1977, февраль**

## ДЕРАЗА

---

Куз келди, баргларни савалаб шамол,  
Ерга сочиб кетди олтин тангалар.  
Деразам тубида ўсган паҳмоқ тол,  
Яланғоч ҳолига уялиб кулар!

Мен эса хурсандман кузакдан роса,  
Эсавер беибо, эй, кузги шамол!  
Шу толнинг ортида бўлган дераза,  
Қўзимга кўринар энди bemalol!

У ерда яшайди ёшлик руҳимни  
Нурларга ўраган соҳиби жамол!  
Шу севгим ҳурмати кеч гуноҳимни,  
Куз ели титратган, эй аймоқи тол!

1977, февраль



## СУВНИНГ ГИНАСИ

---

Сув бўлиб пойингда оқиб ётсам ҳам,  
Тош отиб лойқатма, беқадр қилма!  
Мен сенинг гулларинг илдизида нам,  
Шарбатин олгандир мендан нок, олма!

Агар мен бўлмасам балки ўзинг ҳам,  
Шу ерда шод-хандон кулмасдинг шу дам.  
Гарчи мен пойингда ётибман оқиб,  
Кўзимни узмасман йўлингга боқиб.

Майли сен кўтарма мени бошингга,  
Лекин тош отмагил мағур тўшимга!

1977, февраль



## **ХОТИРАЛАР**

---

Хотиралар йил ўтган сари  
Тонгга қолган чироқларсимон,  
Бир-бир ўчиб боради бари,  
Иллар қаҳри беун, беомон.

Лекин бордир шундайлари ҳам,  
Илларни ҳеч қилмайди писанд:  
Ё муҳрини босгандা алам,  
Ё бўлгандা мислсиз хурсанд.

Иккисининг изи битмайди,  
Битмагандай кўнгил яраси.  
Минг йил яша, дилдан кетмайди,  
Кетганда ҳам қолар қораси!

Иккисининг туби йўқ чуқур,  
Бирни оғу, бирни эса нур!

1977, февраль

## ҚУЗИМ ДЕДИМ...

---

Юлдузим деб атасам сени,  
Қуёш бўлиб куйдирдинг мени.  
Қуёш дея атаганимда  
Не куйларга солардинг мени!

Оҳу десам тоғларга қочиб,  
Армон бўлиб қолма дилимда.  
Қўзим дедим, бағримни очиб,  
Йўлдошим бўл чаман йўлимда!

1977, январь



## БОР БҮЛСИН МУҲАББАТ

---

Бор бўлсин муҳаббат,  
Очилсин гуллар,  
Яшасин тоабад,  
Яшнасин диллар.  
Бор бўлсин муҳаббат  
Нурга чулғаниб.  
Ҳар умр кўрсинг  
Ҳаётга қониб.  
Бор бўлсин муҳаббат,  
Битсин хиёнат.  
Бор бўлсин диёнат,  
Шафқат, ҳамият!  
Ҳижронга ўт кетсин,  
Битсин ғам-алам!  
Шодликдан сўз битсин,  
Қўлда ҳар қалам!  
Ҳаётнинг устуни  
Бўлсин муҳаббат!  
Муҳаббат соф экан,  
Бу ҳаёт агад!

1977, февраль

## РАШК

---

О, севгининг қонли йўлдоши!  
О, севгига отилган шум ўқ!  
Сен кимларни тўкмадинг ёшин,  
Кимлар сендан дод солгани йўқ!

Сен — севгининг пинҳон жосуси,  
Сен — севгига ташланган қармоқ.  
Сенинг кўзинг — маккорнинг кўзи,  
Ичинг қора, кўринишинг оқ.

Сен юракка ўғринчи кириб,  
Дўстни душман қилган ҳам ўзинг.  
Гоҳ қўлига қонли тиф бериб,  
Бир чеккада кулган ҳам ўзинг.

Гоҳ мушукдек юмшоқ суриниб,  
Қишиларни қўйдинг ғафлатга.  
Гоҳ оловдек ёниқ кўриниб,  
Фурсат топиб тутатдинг латта!

Чироқ ёқиб келгандек бўлиб,  
Қора тунга ташлаб кетасан.  
Оқ кўнгилли кишидек қулиб,  
Тубсиз жарга бошлаб кетасан.

Сен — ожизлар ёвуз нияти!  
Сен қалбларда қурдингми макон,  
Не-не марднинг кетар омади,  
Не-не кўнгил бўлади вайрон!

О, Отелло ўринсиз қурбон,  
Муҳаббатнинг гавҳар тож боши!  
Не бўларди қилмасанг гумон,  
Сўнмасмиди севги қуёши!

О, лаънати, рашк отли малъун,  
На шафқатинг, на инсофинг бор.  
Севгига йўқ сендан ёруғ кун,  
Сен сабабли дунё унга тор!

Жаллоддан ҳам баттарсан асли,  
Жаллод бошни ошкор олади.  
Сен-чи, пинҳон Ёсумон кўэли,  
Сендан битмас армон қолади.

Иблис сенинг дўстинг бўлади,  
Оқ кунларнинг қора шарпаси!  
Сенга ажал қачон келади,  
Ёвузликнинг мудҳиши нафаси!!

1977, февраль



## ҲАЛИ ҲАМ УШАСАН...

---

Мен кеча альбомни варақлаб туриб,  
Бир кичик расмингга кўзларим тушди.  
Кўзларим тушди-ю, хаёл чарх уриб,  
Биз юрган боғларга қуш каби учди.

Расмингга термулиб қолдим кўп узоқ,  
Ўша кўз, ўша қош, ўша гул дудоқ.  
Эркимни боғлаган ўша чилвир соч  
Кўксингда тўлғаниб ҳамон дейди: — Қоч!

Уттиз йил ўтибди шунга ҳам дарров!  
Гўёки йилларни ўғирлаб бирор  
Кўл етмас олисга қўйиб кетибди,  
Орага чуқур жар ўйиб кетибди!

Дейдилар: у чилвир соchlарнинг оппоқ,  
Кўзларинг ёнмасмиш аввалдек порлоқ  
Дудоғинг лаълиси ўчганмиш пича,  
Юзларинг эмасмиш қип-қизил кулча!

Йўқ, ҳеч ишонмайман, ёлғондир, ёлғон!  
Ҳали ҳам сен—ўша,  
                        Ўшасан ҳамон!  
Ўшасан ҳали ҳам: ўн саккиз ёшли,  
Ол дудоқ, чилвир соч, арғимчоқ қошли!

1962.

## УМИД

---

Мұҳаббат юртими кашф эта олсам,  
Ошиқлар күнглига берсам тасалли,  
Отелло номига ичайки қасам,  
Тақдирға дер әдим:— Офарин, балли!

Ох қандай соз әди, шундай юрт бўлса,  
Севгидан барча қалб яйраса, кулса,  
Юракда қолмаса ўқинч ва армон,  
Севгидан туғ тутса замину замон.

Энг яхши тушларни шунда кўрардик,  
Энг яхши умидлар туғилар шунда.  
Тушларни умидга қўшиб қорардик,  
Ва бирга гаштини сурардик кунда.

Кўнгилга чўкмасди қайғу ва алам,  
Ўзга бир руҳ билан яшнарди олам!  
Бу олам кўркига маҳлиё одам  
Эртага мамнун, шод ташларди қадам!

Мен севги юртими кашф эта олсам,  
Отелло руҳига ичайки қасам,  
Дунёда энг баҳтили киши бўлардим,  
Дунёда қолмасди армоним, дардим!

1977, март

## ШЕЪРГА МУҲТОЖ ОНЛАР

---

Муродига етганда севги  
Шеър учун қолмайди ҳожат!  
Интизорлик севгининг чеки,  
Севги ҳали унмаган кўчат!

Бир юракка тушса-ю оташ,  
Ўзга юрак қолса бехабар;  
Гоҳо ёниб, кўнгли бўлиб ғаш,  
Минг куйларга тушса ҳар сафар;

Хат ёзса-ю, келмаса жавоб,  
Гул узса-ю, бера олмаса;  
Сўзлар терса дилида ноёб,  
Ботинмаса айтишга эса;

Дир-дир титраб қамти келганда,  
Жўнаб кетгач, соғинса яна:  
Яна йўлин қилмасдан канда,  
Висол онин кутса мардона;

«Эҳтимол у севар бошқани,  
Лойиқ билмас балки ўзига;  
Балки ёнмас севгидан қони,  
Балки кирмас дили сўзига».

О, шубҳанинг серқирра тоши,  
Бунча ўткир бўлмаса нишинг!  
Баъзан тугаб ошиқ бардоши,  
Қон йиғлатмоқ бўлади иши!

Ана шунда шеърга у муҳтож,  
Шоирга дер:— Юрагимни оч!  
Ёки ўзи бир шоир бўлиб,  
Дардин куйлар ўртаниб, тўлиб!

Муродига етганда ошиқ  
Шеър учун қолмайди ҳожат!

1977, март



## **ЮҚСАКЛАРДА ДОИМО ҚҰЗИМ**

---

Юқсакларда доимо құзим,  
Юқсакдадир юлдуз ҳам, ой ҳам.  
Уфқлардан нарида изим,  
Уфқ оша янги бир олам.

Шу оламнинг сирри, асрори  
Юрагимга солар ҳаяжон.  
Ҳаяжоннинг мағурүр виқори  
Яна очар ўзга бир жаҳон.

Жаҳонлардан жаҳон кашф этиб,  
Яшамоқнинг ўзга гашти бор.  
Йўқса ҳаёт қолади қотиб,  
На унда бор севги, дард, виқор.

На интилиш, на баҳор, на қиши,  
На кенг уфқ, на қир, на довон.  
Юқсакларга айтаман олқиши,  
Олисларда орзу ва армон.

Эй, юрагим, бўлгину омон,  
Жаҳон ичра яратгин жаҳон:  
Интил доим юқсакка томон,  
Олисларда завқли ҳаяжон!

1977, март

## МУҲАББАТНИНГ ТАЛАБИ

---

Муҳаббатнинг тили бор, бироқ,  
Ҳар маҳал ҳам тилга кирмайди.  
Тилга кирса, ёқади чақмоқ,  
Бегонага сўзин бермайди.

Ноласидан ёнади тоғ-тош,  
Оҳ тортганда туради бўрон.  
Фигон қилса, қораяр қуёш,  
Ўкинчидан ўкирар сурон!

Севинчини олганда тилга  
Қора тунлар ёришади оқ.  
Нур ёғилиб барики элга  
Яқин келар кўз етмас йироқ!

Лекин ўзи жуда ҳам кам гап,  
Ёқтирумайди ортиқча сўзни.  
Фидо этиб мангуга ўзни,  
Эвазига қўймас ҳеч талаб!

Муҳаббатнинг тили бор, бироқ  
Сўзламоқни ёқтирумас феъли.  
Тил нотиққа керак, дер, ўртоқ,  
Менга эса фақат бир дили!

1977, март

## СЕНИНГ ЮЛДУЗИНГ

---

Сен боқасан олис-олисдан,  
Гоҳ жимирлаб, гоҳ тиниқ ёниб.  
Юлдузингни ўзга юлдуздан —  
Адаштирмай турибман таниб.

Кўзгинамас сени таниган,  
Юрагимнинг хизмати катта.  
«Шу юлдузни йўқотма, деган,  
Шу юлдузда баҳтинг албатта!»

Кўзим эмас, юрагимнинг ҳам  
Сени танир кўзлари бордир.  
Кўзларига меҳрибон, ҳамдам,  
Ширин-шакар сўzlари бордир.

Демак, сени танийман яхши,  
Олислардан порлар юлдузинг.  
«Шу юлдузга интилган киши,  
Шояд десанг:— Ёлғиз бир ўзинг!»

1977, март

## ҲАЁТ НАРВОНИ

---

Бу ҳаёт нарвонга ўхшайди ўзи,  
Энг баланд почада ҳамманинг кўзи.  
Аммо у қўйилган жуда ҳам тикка,  
Юксакда иқболнинг ёруғ юлдузи!

Ҳа, ҳаёт нарвони баланд жуда ҳам,  
Энг баланд почага интилар одам.  
Барча ҳам баландроқ чиқмоқ истайди,  
Лекин муродига етган камдан-кам!

1977, январь

## ҚЎНДОҚДАГИ ИСМ

(Ҳарбий қисмдан хат)

Ўзим ҳам билмайман, қайси бир куни  
Хатларинг қошимга уйиб қўйибман.  
Хаёлда ўтириб (рост айтсам шуни)  
Қўндоққа исмингни ўйиб қўйибман!  
Ана шу автомат ҳамон қўлимда,  
Ажралмас ҳамроҳим юрган йўлимда,  
Гўёки сен ўзинг доим биргасан,  
Ёки шу қуролни ўзинг бергансан  
Ўзинг ҳам биргасан, қурол ҳам бирга,  
Душмандан из тушмас бу она ерга!

Фақат бир андишам бор командирдан,  
Хижолат бўлмасам бу ишга бирдан!

1976.

## БАҲОР КЕЛДИ

---

Баҳор келди, баҳор келди деб,  
Чор-атрофга чалиб қўнғироқ,  
Елкасига баҳорни ортиб  
Тоғдан тушиб келармиш ирмоқ.

Лаббай, лаббай!— дея бинафша  
Ер остидан кўтармиш қулоқ.  
Лола эса қирлардан оша  
Бўй чўзармиш тутиб ол байроқ.

Атири сочиб сойларда ялпиз  
Йўлларига чиқармиш пешвоз...  
...Сой ёқалаб келади бир қиз  
Лабларида минг ишва, минг ноз!

Гул баҳорни кутиб ол, ҳой қиз,  
Сен баҳорга монандсан, ой қиз!  
Сен улғайиб она бўласан,  
Баҳор эса, тўкин-сочин куз!

1977, март



## ҚАНОТ

---

**Неварапарим Комрон билан Ҳумоюнга**

Гўдак эдинг, чироққа боқиб,  
Севинч билан ширин кулардинг.  
Баъзан эса, елкангни қоқиб,  
Уни аста олмоқ бўлардинг.

Сал улғайгач осмонга қараб,  
Тўлинойга чўздинг қўлларинг.  
Ой ҳам сочинг нур билан тарааб,  
Кел-кел дерди, ёруғ йўлларинг!

Энди эса қўлингда қалам,  
Нуқул қанот расмин соласан.  
Ўзинг тугул ҳатто менга ҳам  
Қанот чиз, деб ундан қоласан.

Майли, қанот чизавер, болам,  
Қанот бўлса кишида яхши.  
Бу замонда қанотли киши  
Измидадир бу учқур олам!

1977, февраль,

## ВАЪДАГА ҚЕЛАРДИНГ...

Ваъдага келардинг, мен сенга эса,  
Узоқдан энтикиб, қараб турардим.  
Атрофда барқ уриб чечагу майса,  
Гўзаллик гаштини роса сурадим.

Сен эса уларни босиб бепарво,  
Баъзисин шарт узиб, отиб келардинг.  
На улар кўркига қилардинг парво,  
На улар атридан ором олардинг.

Гул-чечак, майсани севмаган одам  
Севгининг қадрига етармикин, оҳ...  
Шу хаёл фикримга келди-ю, шу чоқ  
Индамай ортимга ташладим қадам!

1976, октябрь

## ДАҲШАТ

На ўлим даҳшати,  
На қилич дами,  
На хоин туҳмати,  
На касал ғами,  
На ваҳший ҳайвон-у,  
На ёвуз оғу  
Қалбимга солади заррача қўрқув!  
Лекин бор дунёда мен қўрқсан нарса:  
Не бўлур китобим ўқилмай қолса!?  
Бу менга ўлимдан ёмонроқ даҳшат!  
Эй, ажал, у кунга етказма, қақшат!?

1964.

## ИЖОД ҲАҚИДА

---

Хиёнат қилмадим она юртга ҳеч,  
Хушомад қилмадим она юртга ҳеч.  
Сохта сўз учмади асло лабимдан,  
Нимаики шаънига дебман — қалбимдан!  
Виждоним амри-ла айтдим ошкора,  
Туз-ноним амри-ла айтдим ошкора.  
Завқланиб куйладим, ёниб куйладим,  
Қувониб куйладим, қониб куйладим.  
Ҳақсизлик ўтганда ўт бўлиб ёндим,  
Ҳақсизлик бўғзига шердек ташландим.  
Ўшанда кимгадир кўриндим ёмон,  
Қўнглида туғилди ўринсиз гумон!  
Покман деб қошида солмади уввос,  
Аламдан ичмадим, ё чекмадим нос!  
Кимгадир ёлвориб кўмак сўрмадим,  
Бошимни ҳам қилиб, маъюс турмадим.  
Чунки мен ҳақ эдим ниятим холис,  
Мақсадим покиза, манзилим олис!  
Виждоним лойқалаб ортга қайтмадим,  
Виждоним зидига бир сўз айтмадим.  
Айтмадим, айтмайман, айтмоқчимасман.  
Шу ҳақ сўз кайфи-ла доимо мастман!  
Бу ҳушёр мастликдир, кайфи ҳам баланд,  
Эҳтимол баъзида бериб қўйса панд!..  
Доимо беғубор янгради созим,  
Баъзида хафаман ўзимдан ўзим!  
Баландроқ пардада куйласам дейман,  
Нафасим етмасдан пушаймон ейман.

Гоҳ ундоқ, гоҳ бундоқ ёзиб кўраман,  
Ҳафталааб аламда ёниб юраман.  
Бари бир ўзимдан кўнглим тўлмайди,  
Ёзганим кутгандек пишиқ бўлмайди.  
Ушанда қаламни отгим келади,  
Бошқа бир ҳунарни тутгим келади.  
Йўқ яна ўзимга келиб қоламан,  
Завқ билан қаламни қўлга оламан.  
Ногиҳон жаранглаб, нур сочиб созим,  
Уфқдан уфқа кўчиб овозим,  
Ўзимга ўзим ҳам ишонмай шунда,  
Баъзида уйғониб ўқийман тунда.  
О, илҳом, мунча ҳам сирли нигоҳсан,  
Бунчалар ўтнафас, қайноқ булоқсан!  
Бир келсанг от суриб, яшнаб келасан,  
Бир олам завқу шавқ бошлаб келасан.  
Мен гангиг қоламан тўлқинларингда,  
Ўртаниб ёнаман ёлқинларингда!!

1976—1977

## МУҲАББАТНИНГ ЁШИ ЙЎҚ

---

Муҳаббатли юрак қаримас  
Муҳаббатнинг ёши йўқ, ахир!  
Қурбинг етса шу чаманга кир,  
Ҳеч ким сани «Нари кет» демас!

Шу чаманга кирган юракнинг  
Кўз ёшидан гуллар унади.  
Шу гуллардан кулган тилакнинг  
Бахт тожига нурлар инади.

Шу нурлардан йўлинг ёришиб,  
Мурод уфқи яқин келади.  
Яқин келган уфқдан ошиб,  
Яна кўнглинг нима тилади?

Муҳаббатли юрак қаримас,  
Муҳаббатнинг ёши йўқ, ахир!

1976, октябрь

.

## СОЛДАТ ҚАҲРИ

---

Жанг чоғи йиқилдим ўқ еб қогиҳон,  
Кўксим қон, қўлим қон, гир атрофим қон.  
Олдинда борарди қонли жанг ҳамон,  
Ҳамон мен ётибман бунда бедармон.

Ёнимда мильтифим, қўндоғида қон,  
Сен эса, жангдасан менсиз бир ўзинг.  
Эшиздим шу жангда бўлибсан қурбон,  
Оҳ, мени истабсан аланглаб кўзинг.

Эҳтимол мен бўлсам ёнингда, дўстим,  
Сен тирик қолардинг соғ ва саломат...  
Аламдан мильтифим қаттиқроқ қисдим,  
Урушга минг лаънат, минг-минг лаънат!

1977, январь



## **МАШРАБ ВАСИЯТИ**

---

Вужудим пок эди, виждоним эркин,  
Узатган оёғим йиғмадим.  
Бу жаҳон қалбимга сиғди-ю, лекин  
Мен ўзим жаҳонга сиғмадим.

Мен ўлсам йиғламаңг. Тирик чоғимда  
Ўзимга мен ўзим кўп йиғлаганман.  
Баъзида гул кўрсам кенг қучоғимда,  
Кўп маҳал аламдан дил доғлаганман.

Мен ўлим ҳақида баъзан ўйласам,  
Ярқираб кўринар хира ранглар ҳам.  
Ўлимнинг даҳшати шунчалар зўрми,  
Шунчалар сирлими бу кўҳна олам!!

1975.

\* \* \*

Туман босмиш уфқни,  
Борар йўлим ёпиқми?  
Ёпиқ бўлса йўлларим,  
Бор-ку метин қўлларим.  
Қўл етмаса, кўзим-чи!  
Фронт кўрган ўзим-чи!  
Йўлим очиб ўтаман,  
Нима менга бу туман!

1976, февраль, Рига.

## ДҮППИ ЧИРОИИ

---

«Дўппингиз бунчалар гўзал бўлмаса,  
Эринмас юракнинг санъати-ку бу.  
Кўнглингиз тўлмасми мисоли оҳу  
Бош узра — чўққида кулиб турмаса?»

Қизиқсанг ҳақлисан, эй меҳмон киши,  
Бу қизлар ҳунари азалдан-азал.  
Бу оддий ҳунармас,  
Юракнинг иши  
Юраги гўзалнинг иши ҳам гўзал!

Шўх қизлар ҳар гулни дур қилиб сочиб,  
Иигитлар бошида яшнаб турсин, дер.  
Ўзи-чи, узоқдан уялиб, қочиб  
«Иигитлар ҳамиша омон бўлсин!» дер.

Иигитлар бўлмаса, дўппилар бунча  
Чиройли бўлмасди мисоли ғунча!

1970.

## БОҒ ЙЎЛИ

---

Мен юрган сўқмоқни тор дема ўртоқ,  
Торлиги, эҳтимол, фазилатдир.  
Сен аввал, азизим, атрофига бок,  
Атрофи ҳаётнинг ўз жаннатидир.

Ана кўр, сўқмоғим боғдан ўтади,  
Сойга ҳам тушади қирғоқ ёқалаб.  
Қўлинг чўз, гулларга қўлинг етади,  
Ҳар қадам ётибди уфқ орқалаб.

Истасанг, чашмада юзинг ювиб ол,  
Истасанг, анвойи чечакларга бок  
Истасанг майсага чўзил бемалол,  
Сукунат қўйнида яқину йироқ.

Қушларнинг нағмаси шовқинга кирмас,  
Шаршарак авжини айбга санама.  
Қўзилар маъраши халақит бермас,  
Қурбақа вақ-вақин завқи йўқ, дема!

Уни кўр, бир така соқолин силкиб,  
Бир талай қўйларни бошлаб боради.  
Энг ортда қўзилар майсалар юлқиб,  
Ишончсиз одимин ташлаб боради.

Қушларнинг галаси ўтди осмондан,  
Арғимчоқ солади кузда турналар.  
Бу йўлдан юрмаган ёниб армонда,  
Умрига ачиниб, қалби тирналар!

1970.

## ҚОРА ДЕНГИЗНИ СОФИНИБ...

---

Ол, денгиз, соғиндим, қучоғингга ол,  
Тўлқинлар узра от, эркала, ўйнат.  
Қалбимда завқларим тошириб қайнат  
Туришинг нақадар кўркаму хушҳол!

Мен сени биламан: эски ошнамсан,  
Мен сени ҳамиша мусаффо кўрдим.  
Ҳар қатра сувингда бир шифо кўрдим,  
Менингдек қадрдон дўстга ташнасан.

Мана мен келибман сени соғиниб,  
Софинган бағрингни, дўстим, оча қол.  
Соғиниб келибман, дўстим, қуча қол,  
Бағрингда яйрайин меҳрингга қониб.

Тўлқиннинг бир-бирин қувиб, минганиб,  
Бир дунё завқу шавқ олиб юради.  
Дилларга тақсимлаб солиб юради,  
Баъзида зарб билан қирғоқдан ошиб.

Гоҳо сен мулоим, гоҳо шиддаткор,  
Гоҳида жимиirlаб тўш ўйнатасан.  
Чеки йўқ қозонсан — нур қайнатасан,  
Барининг ўзича фазилати бор.

Майли сен ўйноқла, майли қайна, тош,  
Ҳаммаси ўзингга хўп ярашади.  
Мен сени кўрдимми, қалбим жўшади,  
Бағрингга ола қол, энди қалам қош!

1960.

## БАЛҚИ БИР ТУШДИР...

---

Муҳаббатим балки бир ҳавас,  
Балки бир тушдир.  
Уфқларни қилса ҳамки қасд,  
Қанотсиз қушдир.  
Балки кўзим алдаган сароб,  
Иигит йўлимда.  
Балки кўкда узилган варрак,  
Ипи қўлимда.  
Аниқ-ошкор билмайман ўзим:  
Нимадир ўзи!  
Лекин доим йўлида кўзим,  
Ғамида кўксим.  
Бўйи-бости кундуз қошимда,  
Тунда тушимда!

1970.

\* \* \*

Бир қўли кесилган одамдан сўранг,  
Наздида шу қўли бордай бўлади.  
Бармоғин гоҳ ўйнаб, гоҳ қилиб таранг,  
Ўзича турли машқ қилиб юради.

Мен ўша бармоқман. Кесиб ташлаб ҳам,  
Сен мендан қутилиб кетмадинг, эркам!

1976, март, Москва

## ЗОЛИМ СЕВГИ

---

[Ишонмаганлар ўқимасини]

У севди, ўртанди, ёнди туну кун.  
Чўп бўлиб кетса ҳам у ёна-ёна,  
Қайрилиб боқмади мағрур жонона,  
Севгиси топмади ижобий якун.

Шунчалар уринди ўзим тияй деб,  
Иложин топмади, бари бир ёнди.  
Баъзида ўзича ишқидан тонди,  
Гоҳ қишда, гоҳ баҳор ёйганида сеп.

Сел бўлиб босарди ёрнинг ҳаёли,  
Тиф бўлиб бағрига ботарди ҳамон.  
Қанча йил ўтди-ю, қанча бир замон,  
У золим севгидан бўлмади ҳоли,

Сочига оқ тушди, тиши камайди.  
Юз-кўзин қоплади илон из ажин.  
Ҳамон у ёнади топмай иложин.  
Ҳамон у золим ёр, бир кел, демайди.

Эр қилди жонона, бу ҳамон бўйдоқ,  
Ҳамон у севгидан бўлмайди холос.  
Баъзида май тортиб, баъзан отиб нос,  
Оҳ, дейди севгига мен бўлдим адoқ.

Уч бола кўрди у қиз, тўнғич ўғлини,  
Мактабга етаклаб кетди ўтган йил.

Бечора ошиқда ҳамон ёнар дил,  
Ҳамон у топмайди совиш йўлини!

Охири йўл топди доктор ўртоги:  
Юрагин алмашлаб берди ўтган ой.  
Тинчиidi чамаси — қилмас оҳувой,  
Сўнгида чиқмаса бирор чатоги:

Докторга, пиrim, деб қўйди у ихлос,  
Келинглар, бўлайлик яхши тилакда:  
Илоҳим севгиси эски юракда  
Қолгани рост бўлсин, рост бўлсин, ҳа рост!!



## ТҮРТЛИҚЛАР

---

Номус-ор түғ тикмас меҳрсиз дилга,  
Шафқатсиз кўзларда бўлмас муҳаббат.  
Ёвузлик кўзласа ким она элга,  
Охири ёекафан қолади албат!



Мен умр дафтарин бир-бир варақлаб,  
Ҳар бетга эзгу сўз ёзмоқ истардим.  
Баъзида ёзолдим ниятим оқлаб,  
Баъзида армонда ич этим едим!



Ҳар умрнинг чақмоқ они бор,  
Чақмоқ бўлиб ёқмоқ они бор,  
Шу он агар қилмаса насиб,  
У умрнинг на бир жони бор!



Жанг эди, ўқ едим. Ётибман ҳамон,  
Жароҳат топибман оғир ва ёмон.  
Ҳаммаси бир зумда бўлади унут  
Falaba bonгини эшитган замон!



Боларимиш! Тайёргина қиёмдан ташиб,  
Уялмайди уясида асал йиққани!

Чиндан асалари бўлсанг боғма-боғ ошиб,  
Гулзорлардан шарбат йигиб келганинг қапи?

Биринчи каломим бўлгандай «Она»,  
Энг сўнгги сўзим ҳам «Она» бўлади.  
Дафтарлар тўлибди «Она»га, мана,  
Ҳали яна қанча дафтар тўлади.

Ёшларнинг кўзёши ошкора-ойдин,  
Кексалар йиғлайди ичига ютиб.  
Эртаси хассани маҳкамроқ тутиб,  
Оғир тин олади юришдан олдин!

Олтин деб, олтиндек сарғайиб юзинг,  
Бунчалар хирс қўйдинг унга, эй киши!  
Ақлинг йиғ, ўнглаб ол вақтида ўзинг,  
Макр тўла қабиҳлик олтиннинг иши!

Тош қаттиқ, тошдан ҳам одамнинг қаҳри,  
Юз бора қатиқ.  
Кун иссиқ, кундан ҳам одамнинг меҳри,  
Юз бора ортиқ.

- Дунёда энг азиз нарса нимадир?
- Она ер ишқи-ю, она тил кўркин.
- Умрни нималар нурга кўмади?
- Ер-дўстлар вафоси, соғ виждан эркин!

Бўёқларга тўла қути бу кўҳна олам:  
Қора рангда фарёд уриб ёнади алам,  
Айрилиққа сариқ рамз-у, оқи покликдир,  
Қайси рангда акс топади кўздан оққан нам?

Нияти улуг-у, дил бўлса тоза,  
Ҳар кимнинг ўнгидан келади иши.  
Сув ичса шарбатдек қилади маза,  
Ёз гаштин беради ҳаттоки қиши!

Мажнундек севолсам, мажнундек ёнсам,  
Манжундек девона бўлардим жон деб,  
Минг афсус, бу орзу ишимас десам,  
Нега сен куласан ҳайратга ботиб?

Қоронғи мушукдай бешарпа тушиб,  
Үйма-үй охиста кириб боради.  
Тонг отгач бир сапчиб, девордан ошиб,  
Ўзини хилватроқ ерга олади!

Булут чиқди. Қир-дала чанқоқ,  
Қир-даланинг дилида нола.  
Номард булут четлаб ўтароқ  
Денгиз узра қайди бир йўла!

Қушларга тош отма, юрсин яйрашиб,  
Ҳаётнинг гаштини суриб, сайрашиб,

?

?

Балки бирор қувноқ киши  
Учиргандир кўршапалак.

Майли мен бўлайин қўлингда таёқ,  
Хасса қил, косов қил, тўйда олов ёқ.  
Истасанг эчкингга қозиқ қилиб қоқ,  
Лек озор бергудек иш қилма ўртоқ!

Йўлингда ҳуриган итнинг, азизим,  
Ҳаммаси қопмайди — сен бунга инон.  
У бири ҳимоя қилади ўзин,  
У бири чиндан ҳам қутиргац, ёмон!

Яхши олим эшигини қоқади шоҳлар,  
Шу туфайли тарихга у кириб қолади.  
Ва аксинча, ёмон олим — сурбет маддоҳлар,  
Шоҳнинг иссиқ пинжин кўзлаб, излаб келади!

Турибман олтмишнинг эшигин қоқиб,  
Бегуноҳ, бенуқсон умр кўрмадим.  
Гоҳида шон-шараф нурида оқиб,  
Гоҳида бесабаб калтак ҳам едим!

Чўққиларда ёнган қор,  
Кун чиққанда йиғлар зор:  
Боққа тушса йўлим дер,  
Жарликларда бўлмай хор!

Қўлимда тоққайчи, боғни оралаб,  
Бегона шохларни кемтиб юраман.  
Кемтилган шохларга баъзида қараб,  
Баъзисин ноўрин, хато кўраман.

●

Қўлимнинг иссиғи қўлингда қолди,  
Интизор кўзларим йўлингда қолди.  
Бўсамнинг яллиғи кун ўтган сари  
Кул босган чўғ каби дилингда қолди.

●

Чироғингни ўзинг ёқиб ол,  
Ёқиб ол-у, ёруғида қол.  
Узоқларга тушсин шуъласи,  
Ўчирмасин бемаҳал шамол!

●

Қор узра қолибди турли-турли из.  
Мана бу ит изи, мана бу арслон  
Мана бу тулкидан, мана бу тўнғиз,  
Бу ердан ўтибди мағрур бир инсон!

●

Ариқ бўлсам сенинг боғингга  
Тиним билмай тун-кун оқардим.  
Сўнг гул бўлиб кенг қучоғингда,  
Яшнаб-яшнаб сенга боқардим.

●

Фазогир зарб билан узилди бирдан,  
Чарх уриб осмонга учиб боради.

?!  
!

Бир дона гул бўлиб ариқда оқсам,  
Эгилиб олишга журъатинг борми?  
Дилингда бор-йўғи оҳ, билан зорми?  
Бас, унда келма, қўй, мен чироқ ёқсам!



Болалар йиғласа айби йўқ.  
Йиғлаб-йиғлаб катта бўлади.  
Катталар қалбида йифи — ўқ,  
Йиғлаб-йиғлаб адо бўлади!



Ҳақиқат кўпригин бузади ёлғон,  
Устуни қанчалик бўлмасин йўғон.  
Ёлғоннинг йўлини тўсиб, ёронлар,  
Йўлида қурингиз у ўтмас тўғон!



Тик терак учидан узилиб япроқ,  
Шамолда чирпирак бўлганча кетди.  
Қаерда ётибди эзилиб япроқ?  
Қаерда юзини чанг-чунг бекитди?



Ўзгалар қалбига кириб боролсанг,  
Ўзгалар меҳри ҳам бўлса кўксингда,  
Сен бахтли одамсан,  
Бўлсин эсингда!



Ҳар бир ерга қўйма қадам оёғим бор деб,  
Ҳамма сўзни тинглай берма қулоғим бор деб.

Оёқ тойиб, қулоқ ноҳақ сўзни тингласа,  
Ҳар эшикда изғиб юрма сўроғим бор деб!



Хаёл чексиз, хаёл беомон,  
Баъзан дилни қилади вайрон.  
Баъзан эса замину замон,  
Азминг билан яшайди омон!



Зор йиғлағ дунёдан ўтган бобомнинг  
Ноласи қулоғим ичра уйғоқдир.  
Мен юрган шу тупроқ ўша тупроқдир,  
Эй, юртим, ўзгадир, энди инъоминг!



Қалбимга ўт тушса, олам келса тор,  
Эй, шеърим, мен сендан паноҳ изладим.  
Юртимга хавф-хатар согланда баттол,  
Энг яхши яроқ деб сени кўзладим!



Мен кўрдим: бургутга агар ўқ тегса,  
Сўнгги бор талпинар яна фалакка,  
Илон-чи, йўлида шарпа йўлиқса,  
Ўрмалаб қочади нурсиз ковакка.



Қуз келди. Ер гўё музaffer солдат,  
Үйқуга кетибди зўр жангдан кейин.  
Устида шинели — япроқдир, албат,  
То баҳор-жанггача уйғотиш қийин!

Ўт ёқдинг кул бўлди. Шамол келди-да,  
Кўкларга совириб кетди ногиҳон.  
Аслида ўт ўзин қурбон қилди-да,  
Сен эса совуқдан асраб қолдинг жон!

Истасанг сопқонга ўзинг солиб от!  
Истасанг бағримга бахш эт қўшқанот!  
Софинган чоғингда шу қанот билан  
Қошингга қайтарман кишина мисли от!

Қонли қўлга қўлинг берма, юқи қолади,  
Эҳтиёт бўл, ғаним отса ўқи қолади.  
Қўлни ювсанг, ўқни олсанг, билки бари бир,  
Юрагингда армон бўлиб турқи қолади.

Ғазабга тўлди-ю, гумбирлаб осмон,  
Шиддатли ёмғирин қўйди беомон.  
Танти ер жим турди, гўёки севган,  
Йигитин зардасин тинглаган жонон!

Сен йиғласанг, менинг кўзимдан  
Ёшим маржон бўлиб оқади.  
Сенга бирор қасд қилса зимдан,  
Зимдан менинг қаҳрим оқади.

— Ўзинг кимсан, десам, дединг, кўзингман,  
Кўзим бўлсанг, ҳу узоқда нима бор?

— Қулогингман ҳар бир сўздан хабардор,  
Демак бир кун кар бўлсанм кўр ўзингдан!

Сен қорда изингни магур кўрсатиб,  
Дедингки, муҳирдек ёнишига боқ.  
Исмини қор эмас, тошга нақш этиб,  
Хокисор юрганлар бордир, эй ўртоқ!

Үн етти ёшимда бир қизни севиб,  
Шу қизнинг ишқи-ла бардамман ҳамон.  
Қексалик эшикдан кирса ҳам қувиб,  
Үн етти ёшимга ҳамдамман ҳамон!

Пешонангга урма муштлаб, «оҳ, пешонам!»  
деб,  
Бекорларга нобуд бўлди азиз ошнам, деб.  
Азиз ошнанг бўлса нега қолдинг бехабар,  
Гулзор қолиб, тиканзорга олганда сафар!

Сув тагида қум оқади,  
Ой ботганда кун болқади.  
Севган ёринг ташлаб кетгач,  
Энди сенга ким боқади?

Гумбирлаб сел келди, кўлоб-кўлоб сув,  
Сичқонлар тирқираб, итлар ҳурарди.  
Фақат бир қурбақа билмасдан қўрқув,  
Кўлобда қувониб сузиб юрарди.

Мўридан буралиб чиққан тутунлар,  
Булутга ўхшашни ҳавас этади.  
Ёмғир айланмай кўкда тутилар,  
Ер узра қайтолмай ёқа йиртади.

Сен болта урасан, бечора дарахт,  
Бир чўчиб бағрига кетар зирқироқ.  
Сен ундан ўзингга бунёд этсанг бахт,  
У эса мангуга кўз юмар бироқ.

Сен кетдинг-ку, эшик тубида,  
Найза пошна изларинг қолди.  
Сенга мафтун киши қалбида,  
Шу излардек сўзларинг қолди.

Озодликнинг нархи жуда қимматдир,  
Лекин ўзи сахий, олий ҳимматдир.  
Унга шафқат, фидоийлик, матонат  
Эгарланган учқир қанот бир отдир!

Шу тупроқнинг қулоғиман, кўзиман.  
Қулоғимни кўкрагидан олмайман.  
Насиб этган тақдиримдан розиман,  
Ўзга әлга ҳавас назар солмайман!

Мен сенинг номингни тошга ўйибман,  
Гулларга ўрабман, тўрга қўйибман.

Баридан ўзингнинг борлигинг яхши,  
На унда, на бунда бир бор тўйибман!



Боғ ичидан қараб ўтдинг,  
Қўнғир сочинг тараб ўтдинг.  
Ўриб қўяй десам, нега,  
Менга оқ йўл тилаб ўтдинг!



Сени кутдим сув сепиб йўлга,  
Қучофимни тўлдириб гулга.  
Ҳатто қиё боқмасдан ўтдинг,  
Чилвир сочинг тўлғаниб белга.



Инжунинг таърифи бир олам албат,  
Жононлар бўйнида кўрмаклик одат.  
Ва лекин ҳамма ҳам дengизга шўнғиб,  
Дур топиб чиқишга қилмайди журъат!



Оқ олма шохида энг сўнгги япроқ,  
Узилиб кетай деб, титраб турибди.  
Шу япроқ ёнида қаҳ-қаҳ этароқ,  
Бир қарға юмшоқ қор тилаб турибди.



Бу тарих китоби доим қўшварақ:  
Бир бети қорадир ва бир бети оқ.  
Оқида эзгу сўз қолдирсанг агар,  
Уз номинг шарафли, тақдиринг порлоқ!

Сен сувга тош отдинг, балиққа тегди,  
Хўш, айт-чи, балиқнинг гуноҳи нима?  
Балиқнинг тили йўқ, бир маҳлуқ дема,  
Виждонинг бир баҳя жойидан чўкди!

Хотира бу эски китобнинг  
Тўзғиб-тўзғиб қолган варағи.  
Тиклай олсанг йўқолган бобни,  
Тиник ёнар фикринг чироги!

Ўлимдан ҳеч кимса қилмайди ҳазар,  
Ўлимга мадҳия ёзмаган ҳеч ким.  
Бу дунё устуни инсони ҳоким,  
Ўлим бор ҳаётининг қадрини сезар.

Бахтиёр кишининг тиллари бурро,  
Дўсти ҳам бўлади ҳаддидаи ортиқ.  
Ҳеч кимса бўлмасин толеи қаро,  
Тиллари қисиғ-у, лаби ҳам тириқ!

Ўчоқни қазибсан, энди олов ёқ,  
Устига ос, дўстим, тоза бир қозон.  
Бўлмаса нимага қазидинг, ўртоқ,  
Нимага керакдир бу чанг, бу тўзон!

Қаерда бўлмайин, қаерда юрмай,  
Мен сенинг номингдан мадад кутаман.

Она юрт! Не ишга қўлимни урмай,  
Мен сенинг бахтингни кўзда тутаман!



Кун ботди. Эртаси чиқмади қуёш,  
Булутлар судралди кўкда оҳиста.  
Кун чиқар уфққа бурганича бош,  
Қуёшини кутарди, бечора писта!



Умр-дарё, отанг кўпrik bemиннат,  
У қирғоқдан — бу қирғоққа ўтиб ол.  
Бу қирғоққа ўтганингда сен албат,  
Отанг қилган хизматига содиқ қол!



Ҳамиша куйманиб, уйқудан қолиб,  
Элу юрт ғамини елкага олиб,  
Озгина қувониб, кўпгина нолиб,  
Юрмоқни истасанг, дўстим, шонир бўл!



Бахтимдан шикоят қилмадим сира,  
Иур билан ёзилди доимо отим  
Ҳар дўстим бўлди-ю, қуйруқ-қанотим,  
Ҳар куним умримдан шонли хотира!



Фарзандлик бурчини ўтаган фарзанд,  
Гўёки шарбатга қўшилган гулқанд,  
Фарзандлар! Ёшлика эҳтиёт бўлинг,  
Баъзида ўт ёшлик бериб қўяр панд!

Мен ўлгандим, қайта тирилдим,  
Фақат сенинг ширин сўзингдан.  
Ол, бахтими мен сенга бердим,  
Ўзга тутма мени ўзиңгдан!

Ўнг кўзинг сўл кўзга бўлганда рақиб,  
Оламда авж олар фисқ-фужур, таъқиб.  
Ёлғону хиёнат сув каби оқиб,  
Бевафо исинар севгини ёқиб!

— Севги нима? — дейсан боқиб кўзимга,  
Шоир бўлсанг шунга жавоб қил.  
— Сенга эмас жоопон, ҳатто ўзимга  
Жавоб топмай қийналади дил!

Мен чироқ бўлмадим қора тунингда,  
Ё асо қариган чоғингда, ота.  
Нимамга шунда ҳам тутиб ёнингда  
Яна бахт тилайсан менга албатта!

Гўзалликни севмаган ким бор?  
Гўзалликда пашъу наво, нур.  
Гўзалликни севсанг, жангга юр,  
Гўзалликка қасд қилмиш беор!

Хиёнат — орқадаи отилган ўқдири,  
Ҳеч кимга муносиб кўрмасин тақдир!

Хиёнат ўқига ким учса ногоҳ,  
«Мен мангу тирикман» деса у ҳақдир.



Ишқ йўли хилма-хил: баъзан боғ ора,  
Баъзида чўл ора, баъзан тоғ ора.  
Адашмай манзилга етиб ололсанг,  
Бахтнингдан миннатдор бўлгни минг бора!



Бахт келар бир марта, синови юзта,  
Ҳар синов тебратиб кўрар оҳиста  
Ҳалол бахт тебранса ўриашар яна,  
Чўқади бемеҳнат топилган бўлса!



Мен боғлиқ яшайман срга, осмонга,  
Мен боғлиқ яшайман гулга, инсонга.  
Гар қўлим шулардан узилиб кетса,  
Билингки, лат етди бу азиз жонга!



Мардликнииг манбаи муҳаббат,  
Ҳақиқат кўркидир адолат.  
Сен кураш тулпорин миғандада,  
Шуларни ёдинигда тут, албат.



Шон-шараф дардида ёниб ёзмадим,  
Шон-шараф дардида куйиб-тўзмадим.  
Кўксимда бор экан ижод оташи,  
Куйлашдан завқландим асло безмадим!

## **ХОТИМА**

---

Ён, чироғим, тонгга қадар ён,  
Еруғингдан ёрисин жаҳон,  
Ён, чироғим, қалбим кутар, ён,  
Ён, чироғим, ором олсин жон!

Сен ёниб тур, мен қилай ижод,  
Қарзим қўпдир элдан, юртимдан!  
Умрим ўтгач, қараб ортимдан  
Демасинлар:— Кўрди бўш ҳаёт!!

Ён, чироғим, тонгга қадар ён!

## МУНДАРИЖА .

---

Замондошимга . . . . .	5
Орзу ҳақида . . . . .	7
Шоир . . . . .	8
Хавотир олма, отажон! . . . . .	11
Комсомол мадҳияси . . . . .	13
Сенинг шаъннингга, ўлкам! . . . . .	16
Ёшлик баҳти . . . . .	18
Қизил майдондан ўтганда . . . . .	19
Бир коса шарбат . . . . .	22
Онам, она тилим, она юртим . . . . .	23
Шошма, эй булоқ! . . . . .	27
Мен танлаган йўл . . . . .	28
Айт-чи, қиз . . . . .	29
Асти сўнмас нур . . . . .	30
Бу давр шунаقا . . . . .	32
Умр йўлдошимга . . . . .	34
Тошбақа . . . . .	35
Ёшлик ва ёшлар ҳақида . . . . .	36
Юқорига юр . . . . .	40
Ҳамиша йўлдаман . . . . .	41
Ўкинма ҳеч (ўғлимга) . . . . .	43
Қўғирчоқ . . . . .	44
Чироқлар ёнарди хира . . . . .	45
Сен бунда ётасан . . . . .	46
Юз минглар мозори . . . . .	48
Сен баъзан . . . . .	50
Интилиш . . . . .	51
Уч-тўртта оқ тола . . . . .	52
Оташ . . . . .	53

Соқол ҳақида . . . . .	55
Сирли олам . . . . .	57
Мерос . . . . .	60
Қирғоқлар . . . . .	62
Сени севдим . . . . .	63
Илҳом (оқ шеър)	64
Юлдузлар . . . . .	65
Булоқ . . . . .	66
У мени севмади . . . . .	67
Она тилим — ширин сўзим . . . . .	69
Ишқ . . . . .	71
Ажин . . . . .	72
Дарёга хитоб . . . . .	74
Агар . . . . .	76
Қўмсаш . . . . .	77
Севгининг ёши нечада? . . . . .	78
Шеър билан ёшлик эгизак . . . . .	79
Қалбимни қайтар ўзимга . . . . .	80
Ёшингни санама! . . . . .	81
Кўзлар ҳақида . . . . .	82
Лочин . . . . .	83
Баҳорда кел, дединг . . . . .	83
Баҳор кезида . . . . .	84
Аттанг . . . . .	84
Сен-чи? . . . . .	85
Дўстимга берган саволим . . . . .	86
Мендан яширма . . . . .	87
Севгимда ён дейсан . . . . .	88
Оқ шеър . . . . .	89
Йиглама ҳеч ҳам . . . . .	90
Дардинг бўлса, айт . . . . .	91
Боиси ўзинг . . . . .	92
Майли баҳтиёр бўл . . . . .	93
Саволлар . . . . .	94
Ёнингда борардим . . . . .	95
Севги нима? . . . . .	95

Севги калити . . . . .	96
Онангни учратдим . . . . .	97
О, севги . . . . .	98
Лекин, сен севма! . . . . .	99
О, табиат . . . . .	100
Дераза . . . . .	101
Сувнинг гинаси . . . . .	102
Хотиралар . . . . .	103
Қўзим дедим . . . . .	104
Бор бўлсин муҳаббат . . . . .	105
Рашк . . . . .	106
Ҳали ҳам ўшасан . . . . .	108
Умид . . . . .	109
Шеърга муҳтоҷ онлар . . . . .	110
Юксакларда доимо кўзим . . . . .	112
Муҳаббатнинг талаби . . . . .	113
Сенинг юлдузинг . . . . .	114
Ҳаёт нарвони . . . . .	115
Қўндоқдаги исм (Ҳарбий қисмдан хат) . . . . .	115
Баҳор келди . . . . .	116
Қанот . . . . .	117
Ваъдага келардинг . . . . .	118
Даҳшат . . . . .	118
Ижод ҳақида . . . . .	119
Муҳаббатнинг ёши йўқ . . . . .	121
Солдат қаҳри . . . . .	122
Машраб васияти . . . . .	123
Туман босмиш уфқни . . . . .	123
Дўлпи чиройи . . . . .	124
Боғ йўли . . . . .	125
Қора денгизни соғиниб . . . . .	126
Бир қўли кесилган одамдан сўранг . . . . .	127
Балки бир тушдир . . . . .	127
Золим севги . . . . .	128
Тўртликлар . . . . .	130
Хотима . . . . .	148

Ш 97

**Шухрат.**

Шайдо кўнгил. Шеърлар [Сўз боши Э. Воҳидов].— Т.: «Ёш гвардия», 1979С.— 152 б.

**Шухрат. Влюблённое сердце.**

Уз 2

На узбекском языке

**Шухрат**

**ВЛЮБЛЕННОЕ СЕРДЦЕ**

**Стихи**

Издательство «Ёш гвардия»

Ташкент — 1979

Редактор Шамси Одил

Рассом Қ. Алиев

Расмлар редактори Э. Валиев

Техн. редактор Г. Аҳмаджонова

Корректор М. Юнусова

**ИБ № 474**

Босмахонаага берилди 2/II-1979 й. Босишига руҳсат этилди 13/IV-1979 й. Формати 70×90<sup>1/32</sup>. Босма листи 4,75. Шартли босма листи 5,55. Нашр листи 4,15. Тиражи 35000. Қоғоз № 1. Заказ № 4740.

Баҳоси 40 т. Р—08971. Шартнома 32—78.  
Ўзбекистон ЛКСМ Марказий Комитети  
«Ёш гвардия» нашриёти, Тошкент, Навоий  
кўчаси, 30.

Ўзбекистон КП Марказий Комитети  
наширигининг Меҳнат Қизил Байроқ  
орденли босмахонасида босилди.  
«Правда Востока» кўчаси, 26.

Ш 70403—35  
356 (06)—79 77—79